

UNSAON KO SA PAGDAUG?



Iduko nato ang atong mga ulo alang sa pag-ampo.

Amahan namo, kami nagapasalamat Kanimo, niining buntaga, alang sa niining dakung kahigayonan nga nagkatigum kami pag-usab, ug aron sa pag-abli sa Pulong sa Ginoo, nga ania Kini karon sa among atubangan. Ug—ug karon nagaampo, nga dalhon sa Balaang Espiritu kana nga mao ang Dios, ug ipahayag Kini kanamo, aron nga sa pagbiya namo karon sa niining dapit nga alampoanan malipayon ang among mga kasingkasing og puno sa kalipay. Makita ang Imong dakung gahum sa pagtubos, Ginoo, kung giunsa niini pagluwas ang mga binihag ug gihatagan sila og kagawasan, nga ginapahibalo kanamo “ang mga butang kaniadto, ug ang sa karon, ug ang umalabot.” Ug ginapasalamatan Ka gayud namo tungod sa niining mga butang.

² Nagaampo kami nga Imo kaming panalanginan sa diha nga among dungan pagatun-an ang Imong Pulong karon. Ug sa diha nga manguli na kami, hinaut nga masulti namo sulod sa among mga kasingkasing, samtang kami diha sa mga dalanon, “Nagdilaab gayud ang among mga kasingkasing sa sulod namo sa diha nga Siya, ang Espiritu Santo, nakigsulti kanamo samtang nga nagapanguli kami.”

³ Panalangini ang matag ministro karon, sa tanang dapit, ang Imong mga alagad nga nanagbarug Niini, ang Imong Kamatuoran. Dungga ang ilang mga pag-ampo alang sa mga masakiton. Ayoha ang masakiton nga mga lawas sa kadtong mga nanag-antus niini.

⁴ Ginoo, nagahangyo kami nga mokunsad Ka sa taliwala sa katawhan ug pangitaon kanang gipili-nang-daan nga binhi dinha, Ginoo, ug dalhon kini dinhi, sa kung unsang paagi, nga madan-agan kini sa Kahayag diha sa dalan, Ginoo. Tungod kay, nagatoo kami nga ang takna haduol na kaayo, ang adlaw pa-salup na gayud didto sa kasadpan, unya dili na magdugay nga “patapos na ang panahon.” Ang panahon ug ang Eternidad magkauban na pag ang Dios ug ang Iyang katawhan nahiusa na. Ug nagaampo kami, Dios, nga, sa nianang panahona, mahiapil kami uban sa kadtong mga nahiusa na kang Cristo, nga ginatawag nga Iyang Pangasaw-onon.

Tabangi kami, karong adlaw, samtang nga nangandam kami, nga dili namo hingbaw-an kung unsay mahitabo sa umalabot, apan andam kami nga modawat sa unsa man, Ginoo, ingon sa among nasayran, nga aduna Ikaw giandam alang kanamo. Andam na kami sa pagdawat Niini. Ginapangamuyo namo kini nga panalangin alang sa kahimayaan sa Dios, sa Ngalan ni Jesus Cristo. Amen.

Makapanglingkod na.

⁵ Malipayon gayud ako, niining buntaga, sa pagsulod ko ug nakita nga ang—ang mga tawo nanagkatigum alang sa serbisyo sa Ginoo. Ug manghatag kami karon og mga pagpahibalo para unyang gabii. Magkaadunay serbisyo alang sa pagpang-ayo unyang gabii. Magaampo kami alang sa mga masakiton, unyang gabii. Kaganina lang, ilang. . .

⁶ Pagsulod ko, si Billy, ang akong anak nga lalaki, nagsulti kanako, miingon, “May usa—usa ka lalaki dinhi, luoy kaayo nga tawo nga nagbiyahe gikan pa sa halayong dapit.” Ug miingon, “Akong—gidala ko siya sa sulod sa kuwarto, Dad.”

⁷ Ako—gabii na gyud ako nakauli kagabii, ug—ug wala nakatuon og ayo sa pang-Sunday school nga hilisgotan nga akong pagahisgotan, niining buntaga. Busa nagkuha na lang ako og pipila ka sinulat nga akong nakuha gikan sa kung unsay akong nadungog nga giwali sa usa ka igsoon, ug mikuha gikan niana og usa ka teksto, para medyo aduna kita’y pang-Sunday school nga leksyon karong buntaga; ug samtang nga ginaandam nato, ug nag—andam para sa pang—gabii nga panerbisyo.

⁸ Ug miingon si Billy, “Adunay usa ka tawo didto sa sulod nga masakiton.” Ingon pa, “Ako—ako—nanghinaut ako nga imong adtoan ug susihon siya.” Busa, misulod ako sa kuwarto kaganina lang. Ug usa ka igsoon nga mga kaedad ko, ug ang iyang asawa, ang atua didto sa sulod. Ug ang Balaang Espiritu mikunsad sa among taliwala didto sa kuwarto kaganina.

⁹ Hunahunaa lang, ginahisgotan pa gani ang serbisyo sa pagpang-ayo, ug didto na Siya. Kita n’yo? Ug gisuginlan Niya kini nga igsoong lalaki mahitungod sa tanang gipangbuhat niini, ug kung unsay iyang gipanghimo, ug unsay hinungdan sa iyang problema, ug kung asa siya gikan, ug ang tanan nga mahitungod kaniya. Ug aduna niadto og usa ka dakung maitum nga landong sulod sa kuwarto. Dayon misugod kini nga nagahayag, nga nagakahayag, nga nagakahayag, ug nagakahayag pa, dayon ang Balaang Espiritu na ang mikontrolar.

¹⁰ Karon, siguro ang maong tawo anaa dinha sa . . . anaa dinha sa luyo karon. Siya ug ang iyang asawa tingali wala makasulod sa bilding, pero nag-ingon sila nga magpabilin sila, sa gihapon, alang sa panerbisyo. Gikan pa sila didto, duol sa Yakima, Washington, ug nagbiyahe paanhi dinhi. Ug usa siya ka ministro sa Ebanghelyo.

Apan aron nga makita gayud ang grasya sa—sa Dios didto! Kon diin, gikan na sa ospital ang maong tawo ug nagkaaduna na og mga panambal ug tanan na. Gipadayag kini tanan sa Balaang Espiritu. Sa ingon nga, naningkamot gayud ang mga doktor nga himoon ang tanan kutob sa ilang mahimo, tingali, para sa maong tawo, apan nagkinahanglan lang kadto og usa ka gamay nga paghikap gikan sa Dios, aron usabon ang kahimtang. Maayo man

ang pangpakalma nga pagpanambal, pero medyo usa kini ka matang nga matawag nato nga “usa ka pagpanginbasin,” kabalo na mo. Kamo, mahimo kamong mapagrabe pa tungod niini, kita n’yo, tungod kay mahimo mong malimtan ang tanan-tanan mong nahibaloan, sa dihang gamiton nila kini nga pagpanambal diha kanimo. Apan ang Ginoong Dios, kung unsa gayud ang Iyang grasya ug kalooy! Ug bisan sa wala pa ako mihalad og usa ka pulong sa pag-ampo alang kaniya, giayo na kini. Kita n’yo? Nagkinahanglan lang kadto og usa ka butang nga gikan sa Dios, kanang pihong paghikap, aron nga mahimo kadto.

Dili ko unta isulti kini. Oo. Ginatan-aw ko dinha, kung makita ko ang maong tawo karon. Bueno, wala ako kabalo kung makaanhi ka ba karon, o dili.

¹¹ Didto sa lugar kon diin ako nagpuyo, niining semanaha. Ako—ako—gimahal ko ang mga higala ko didto. Usa kadto ka mubong bakasyon sa wala pa kining dagkung mga tigum, kabalo na mo. Ug mipauli ako, aron moadto didto ug makapangayam og mga squirrel uban sa maong mga kaigsoonan. Ug kini nga pamilya, mga pamilya, diay, nga ginapuy-an ko didto, makahimuot gayud nga mga tawo. Ug ang lalaki, usa gayud ka tinuod nga igsoon, mga higala ko; gayud sila.

Ug ang usa kanila mahilig gayud og—og mga irong igpangayam. Ug aduna siya og usa ka tangkal nga puno sa mga niini didto. Ug—ug nakakita ako og maanindot kaayo nga gamay’ng iro didto, usa ka iro-igpangayam, ang tawag ko kadto, “katunga sa usa ka iro ang kahabugon ug mga duha ka iro ang katas-on,” kabalo na mo, nga—nga nagdagan-dagan palibot didto sa maong balay. Ug nahunahunaan ko, “Aba, dili kaha magustohan ni Joe nga magkaaduna og iro nga sama niana!”

¹² Ug, siyempre, didto sa Arizona, dili kini didto puede. Pagmasangit siya sa cactus, ug mao na ang mahimong kamatyan niini. Mao nga miingon ko, usab, “Dili ka pueding magkaaduna niini. Dili sila nagagamit og mga iro didto, sa nianang bahin sa nasud. Tungod kay, ang mga iro, bueno, basta nga dili gayud nila magamit ang mga niini. Ang mga niini . . . ilabina, tungod sa panahon, tungod sa—sa kahimtang sa maong lungsod nga aduna og mga cactus, ug mamatay lang ang mga iro didto.” Ug dugang pa, sa tinuod lang, ang iro didto, usa ka—usa ka lobo, o ingon niana ang mahimong mopatay kaniya, tingali, bisan pa man, pagmogawas siya didto.

¹³ Busa kini nga tawo miingon kanako, “Imo na lang kana nga iro.” Apan ako—dili ko mahimong dawaton kadto nga iro. Ako—gipasalamat ko sa gihapon kadto. Nahibaloan ko na lang, nga usa diay kadto sa mga paborito niyang iro.

¹⁴ Ug kini nga tawo adunay buutan nga asawa ug mga bata. Ug sa miaging adlaw, gipaatas sa iyang asawa ang sakyanan, ug aduna siya niadto og Oldsmobile nga sakyanan. Ug ang gamay

nga iro mga *ingon* lang kataas, usa lang ka itoy. Ug naligsan mismo niya kini. Diretsong naligsan sa maong Oldsmobile ang iro, mismo sa likod niini *dinhi*, ug nabagnos kini didto, diin ang mga bato sa agianan sa maong sakyanan mitusok sa gamay'ng tiyan niini, kabalo na mo. Ug—ug ang luoy'ng asawa, imbes nga dalhon diretsa ang gamay'ng iro ngadto sa betenaryo. . . Siyempre, patulogon lang kini dayon sa betenaryo, ug patyon kini. Kita n'yo?

May kauban ako nga laing batan-ong lalaki. Ug sa pag-abot gyud niya didto, miingon, “Kung akong iro kadto, pusilon ko na kini.” Miingon, “Ingon-ana lang. Pasagdan pa ba nga mag-antos kini nga sama niana?”

¹⁵ Miingon ako, “Bueno, dili nato pusilon kini.” Ingon ko, “Maghulat pa kita og diyutay.”

Gipapalayo ko ang tanan, ug giduolan ug nag-ampo alang niini. Ang maong gamay nga iro misunod na kanako didto sa balkonahe. Ug kini, [Nangalipay ang kongregasyon—Ed.] oo, kini. . . Kita n'yo? “Bisan unsa nga mga butang nga buot ninyong pangayoon, sa diha nga kamo mag-ampo, toohi nga inyo na kining nadawat; kamo magadawat niini, nga igahatag nganha kaninyo.” “Bisan unsa nga mga butang.” Ingon niana ang atong Ginoong Dios. Dili ba? [Nagaingon ang kongregasyon, “Amen.”] Siya—Siya gayu'y kahibulongan ug katingalahan. Ug ginahigugma gayud nato Siya, niining buntaga; ug nagapaabot Kaniya, ug nasayod gayud.

¹⁶ Nakita ko, niadtong miaging mga adlaw, ang usa ka—usa ka tigulang nga magtiayon, ang inahan ug amahan sa usa ka buotan kaayo nga miyembro sa niini—niini nga kongregasyon sa mga magtotoo. Ug ang inahan, oh, tingali hapit na siya mag-usa ka gatus, ug ang papa, usab. Ug sulod sa mga dose ka tuig kini nga tawo dili gayud makalihok; diha sa iyang likod, nagahigda na lang nga tuy-od. O, dili siya makatagilid, o unsa pa man. Naghigda na lang didto sulod sa dose ka tuig. Tigulang na gayud! Ug ang inahan sa karon mga kaedad usab niya, siguro, mga hapit na sa usa ka gatus, ug ang makalolooy nga tigulang nga babaye halos nawad-an na siya og pagkontrolar sa iyang pangisip. Ang hunahuna niya nga gikuha na ni kinsa man ang tanan nga aduna siya.

Ug mitan-aw ako sa . . . tabok sa lamesa, sa tanan kanamo, mga batan-on ug tigulang, nga nanggilingkod didto. Ug ingon ko, “Asa na man kita padulong ani? Unsa na may atong ginabuhat?” Ug ang gining nga didto ako nagsaka kaniadto, mao kadto ang iyang inahan ug papa. Ug miingon ako, “Padulong ka niana, usab. Sigurado gyud, ang matag usa sa kanato.” Kita n'yo?

¹⁷ Hunahunaa lamang kini, sa kadali lang, sa dili pa kita magsugod sa atong hilisgotan. Dinha kamo paingon. Alang

sa unsa man nga nakigbisog kamo? Aron nga mabuhi kamo. Alang sa unsa man nga nanginabuhi kamo? Aron nga mamatay kamo. Dili ba kini mamahimong labing binuang kung wala nato dawata ang gitagana sa Diyos alang sa Kinabuhing Dayon? Unsa pa man ang atong hunahunaon? Unsa—unsa pa man ang mahimong mosulod sa atong hunahuna, nga makadani sa atong pagtagad gikan. . . sa bisan unsa nga butang? Unsa kaha kon gipanag-iya mo ang usa ka gatus ka milyon nga dolyares, ug gipanag-iya mo ang tibuok estado sa—sa Indiana, o sa bisan unsa man nga uban pa nga estado, o bisan ang nasud mismo, o, kung ingon niana man ang hisgotan, ang tibuok kalibutan mismo?

Mabuhi ka man sa igong gidugayon, modangat ka sa pagkaingon niana sa gihapon, bisan pa man. Kita n'yo? Ug kanunay, sa adlaw-adlaw, sa matag pitik sa inyong kasingkasing, paingon kamo mismo niana. Kita n'yo? Ikaw, dili ka gyud modaog. Anaa ka sa dapig sa kapildihan, ug, ikaw, siguradong pildi gyud ka. Apan hinumdumi ang saad, nga, “Siya nga mawad-an sa iyang kinabuhi tungod Kanako makakaplag siya niini.” Karon, unsa pa ba nga kabtangan ang mahikaplagan nga molabaw pa kaysa Kinabuhi, bisan pa makaplagan mo man nga ang tibuok kalibutan mamaimo? Apan, kung inyong—kung inyong makaplagan ang Kinabuhi, nahikaplagan mo na ang labing daku nga butang nga mahimong mahikaplagan. Gusto ko nga. . .

¹⁸ Mitan-aw ko sa akong wala ug nakita pag-usab, karon pa, ang usa pa ka tropeyo sa grasya sa Ginoo. Mga pipila na ka mga semana ang milabay, gitawgan ako sa telepono. Ug ang usa ka hiligugmaon nga miyembro niini nga simbahan, o sa niining lawas. . . Dili ko kaayo gusto nga tawgon kini ingon nga usa ka iglesia. Ako—gusto ko nga tawgon kini, nga. . .

Sama na lamang niadtong nakigsulti ako ngadto sa pipila ka mga tawo, miingon sila, “Bueno, miyembro ka sa unsa man nga iglesia?”

Miingon ako, “Dili ako miyembro sa. . .”

“Unsa man nga denominasyon ikaw nahisakop?”

Ingon ko, “Wala.”

Miingon, “Bueno, sa unsa man diay ka miyembro?”

Ingon ko, “Sa usa ka Ginghamarian.”

¹⁹ Usa ka Ginghamarian! “Ug pinaagi sa usa ka Espiritu gibautismuhan kita ngadto niana nga Ginghamarian.” Pinaagi sa usa ka Espiritu, ang tanan, pasulod niini nga Ginghamarian! Si Jesus miingon, “Mag-ampo kamo, ‘Umanhi ang Imong Ginghamarian. Pagabuhaton ang Imong kabubut-on dinhi sa yuta, maingon man sa Langit.’” Karon, mitindog Siya didto usa ka adlaw sa atubangan sa Bukid sa Pagkausab-sa-Dagway, miingon Siya, “Sa pagkamatuod, nagaingon Ako kaninyo, nga

ang uban sa mga nagabarug dinhi, dili makatila og kamatayon, hangtud nga makita nila ang Ginghamarian nga moanhi nga may gahum.” Una na kini nga gipakita nang daan, maingon nga bag-ohay lang nato nahisgotan kana, ang Bukid sa Pagkausab-sa-Dagway. Ug miingon ang Biblia, “Ang Ginghamarian sa Dios anaa sa sulod kaninyo.” Busa, usa kini ka katawhan sa maong Ginghamarian nga nagapamahayag nga kini dinhi dili ilang lugar. Dili kini atong lugar. Nagapaabot kita alang sa Pag-anhi sa Hari, nga maoy magpatindog sa maong Ginghamarian.

²⁰ Gitawgan ako niadto tungod sa usa ka dinalian nga tabangonon, usa—usa ka tigulang nga igsoong lalaki nga nahimong morag papa na kanako. Ug siya. . .dili ko pa siya dugay naila, apan nahinumdan ko kadtong adlaw na gidala ko siya dinhi alang sa pagbautismo sa tubig. Ug ang maong tawo hapit na magnobentay-uno ang panuigon. Ug ang buutan niya nga asawa nanawag kanako, ug tungod nga usa siya ka nurse, miingon, “Nagkaaduna siya og grabe nga pag-ataki sa kasingkasing.” Gawas pa niana, nagkaaduna siya. . .Oh, akong gitawag nga. . .dili ko mahinganlan. Atake sa kasingkasing. [Nagaingon ang igsoong babaye, “Coronary.”—Ed.] Coronary heart attack. Salamat. Coronary heart attack, ug usa ka grabe nga pag-ataki sa kasingkasing. Wala gyuy gihatag nga paglaum ang doktor, man lang. Ug himalatyon na ang maong tawo, ug mihangyo siya nga ipatawag ako.

²¹ Ug misakay ako sa akong gamay nga daan na nga Ford, ug misugod na’g biyahe paingon sa Ohio, sa ingon ka kusog nga mahimo ko. Ug wala ko kabalo, nga wala diay sa linya ang usa sa akong mga ligid, nalaknit hinoon ang guma niini. Ug dayon akong. . . sa pag-adto didto. Sa paggawas ko gikan sa estasyon sa gasolinahan, mga alas onse na. Nabalaka na ako kaniya. Ako—gimahal ko siya. Ug nasayod ako, nga kung—kung magpadayon pa kini, kung ang Ginoo magdugay pa, aba, dili magdugay, biyaan na gayud nato ang usa’g usa.

²² Apan, dili niini mapugngan ang Pagsakgaw, karon. Kita n’yo? Dili. Magauna usá sila, nianang tungora. Pribilehiyo nila kana, kadtong mga nangamatay na. Magauna usá sila. Kita n’yo? Kita n’yo? “Kita nga mga buhi ug magapabilin pa, sa Pag-abot sa Ginoo, dili magapugong o magauna niadtong mga nangatulog. Motingog ang trumpeta sa Dios; ang mga nangamatay diha kang Cristo mouna sa pagpamangon. Dayon pagnakita na nato ang atong mga minahal sa kinabuhi kaniadto, nan kita mangausab, sa kalit, sa usa ka pagpamilok, ug uban kanila pagasakgawon kita.” Kita n’yo? Mas ma-pribilehiyo ang mga nangauna na nga mitaliwan kaysa niadtong mga buhi.

²³ Samtang pagawas ako sa estasyon sa gasolinahan, mga alas onse, ang Espiritu Santo miingon kanako, “Ayaw kabalaka bahin kaniya. Malamano mo siya, pag-usab diha sa dalan, ug

magasimba siya,” nobentay-uno na ang panuigon sa maong tawo, nga niadtong tungora naghimalatyon na.

Sa diha nga nahimamat ko ang iyang asawa ug ang mga minahal niya sa kinabuhi sulod sa hospital didto sa Lima, gisugingnila nila ako mahitungod sa kahimtang niya. Misulod ako, gitang-aw siya didto. Ingon niya, “Apan may sa kung unsang butang nga nahitabo kaniya.” Ingon pa, “Siya—nagsugod siya nga nag-arang-arang, kaganinang mga alas onse.” Bueno, ug akong...Daghan kaayo nga mga butang ang ginapakita sa Ginoo kanila nga mga tawo, nasayod sila nga dili ko basta na lang isulti kadto. Tungod kay, una na nila gisulti kini kanako, “Nagsugod na siyang mag-arang-arang.” Nasayod sila nga mosulti ako kanila sa kamatuoran.

²⁴ Busa, sa miaging Domingo, samtang paadto ako didto sa Blue Boar Cafeteria sa Louisville, kon diin siguro mga otsenta porsiyento sa niining kongregasyon ang nagatipok didto Domingo sa hapon, aron mangaon, kinsa ba ang nakita ko nga nagalakaw didto sa dalan? Sultihan ko kamo, milukso-lukso ang akong kasingkasing sa diha nga nakita ko ang atong Igsoong Dauch nga nagalakaw didto sa dalan, sa tukma gayud kon unsa ang Iyang gisulti kanako. Gilamano ko ang iyang kamot, didto sa—didto sa dalan.

²⁵ Dayon ako—ako mibalik dinhi para sa gabii niadtong miaging Domingo ug naghigot bahin sa hilisgotan nga panaghiusa, mahitungod sa *Ang Ilhanan Sa Panahon Sa Panaghiusa*. Busa...Ug dayon gipahitabo kadto, kung unsa gayud ang Iyang gisulti. Ug ania siya nga nagalingkod sulod sa simbahan karon, ania mismo abay kanato, ingon nga usa ka tropeyo sa grasya sa Dios. Sa dihang gilamano ko siya sa didto siya sulod sa balong-balong, sa nahimutangan niyang oxygen tent, miingon ako, “Igsoong Dauch, mamaayo ka na. Magkita-kita kita sa simbahan pag-usab. Nga, kana mao ang MAO KINI ANG GIINGON SA GINOO.” Kita n’yo? Ania siya dinhi nagalingkod sulod sa simbahan, dinhi mismo karon, si Igsoong Dauch.

²⁶ Kon wala ko masayup, ang ministro nga akong gipahanungdan, sa pipila ka mga gutlo ang milabay, ang Espiritu Santo misulod ug gipadayag ang tanan niining mga butang; gisultihan siya kung unsa nga nahitabo kadto, ug gisultihan siya kon unsa ang iyang nabuhat; kung unsa nga kini nahitabo, kung giunsa niini pagkahitabo, ang tanan nga nagakahitabo sukad niadto, bisan sa kinaiya sa iyang pamilya, ug ang tanan na mahitungod niana. Ug gisultihan siya, nga, “Kini sulbad na.” Ug nagalingkod ang maong ministro dinhi mismo, sa tuo nga bahin. Mahimo mo bang ipataas ang imong kamot, sir? Atua ra, siya ug ang iyang asawa, sa tukma gayud, sa karon.

Ania nagalingkod usab si Igsoong Dauch, dinhi mismo karon. Oh, sus!

²⁷ Dili ba nga kahibulungan Siya? [Nagaingon ang kongregasyon, “Amen.”—Ed.] “Ang mga butang nga kaniadto, ang sa karon, ug ang mahitabo pa lang.” Usa, duha, tulo ka mga saksi. “Ang mga butang kaniadto, kung unsa ang imong nabuhat; ang mga butang nga nagakahitabo sa karon; ug ang mga butang nga mahitabo pa lang.” Ug sa matag higayon, tukma gayud, eksakto gayud sa Pulong. Ang bugtong Dios lamang ang makahimo niana. Oh! Dili ba kita ang labing malipayon tungod sa niining mga butang? [“Amen.”]

²⁸ Karon, ang rason kon ngano nga medyo naglangan-langan ko, kinahanglan pa man gud ni Billy adtoan ug kuhaon ang iyang asawa ug bata. Ug miingon siya, “Daddy, ayaw pagsugod og wali nga wala pa ko makabalik.” Busa, ako—siguro nakabalik na siya karon. Ug kinahanglan ko nga medyo maglangan-langan, usab. Ug ginapaningkamotan ko nga likayan kining upat ka oras nga pagpalisod ko kaninyo dinhi, ug himoon kining trayntay-tres, kuwarenta na lang ka minutos, nakita n’yo, ug paningkamotan nga tumanon kini.

²⁹ Karon, dunay mikomentaryo kanako usa ka higayon kaniadto didto sa Chicago. Nahimo ko kadto sa traynta minutos, o mga ingon niana lang, trayntay-singko minutos. Ug sa miaging Dominggo sa gabii mga trayntay-singko minutos lang. Miingon si Billy, “Nag-improve ka na gyud, pa. Medyo mapasigarbohon gyud ako kanimo, tungod niana.”

³⁰ Bueno, siguro, niining buntaga, aron himoon kini nga medyo tipo pang-Sunday school lang, dili ko usab kamo langanon. Dayon makapanggawas na kamo ug makapaniudto na kamo, ug makaampo, ug makabalik unyang gabii alang sa panerbisyo sa pagpang-ayo. Maghimo kita og usa ka linya sa pagpang-ampo unyang gabii ug mag-ampo alang sa mga masakiton.

³¹ Karon, kon aduna kamo’y kaila nga bisan kinsa man nga tawo sa palibot, bisan asa, nga masakiton ug gusto nga maiampo, dalhon ninyo sila dinhi unyang gabii. Kita n’yo? Kung kinahanglan man ninyo sila nga sakwaton, sa unsa man nga paagi, dad-on ninyo sila dinhi. Kita n’yo? Mao kana ang pinaka-importante, mao, ang dalhon sila dinhi unyang gabii. Magkita-kita kitang tanan. Sa niana nga paagi sa . . . Malisud ang pagtawag-tawag, mag-adto-adto sa mga lugar; dayon may mabiyaan ka nga tawo, ug magbati ka og kalisud. Apan kung matigum ko silang tanan diha sa usa ka lugar, dayon mag-ampo ako alang kanila. Karon, kung kamo . . . Kung ang mga tawo gusto nga maiampo, sila . . . Mag-ingon kamo, “Maiampo kaha sila?” Oh, sigurado gyud. Maiampo gyud sila. Dad-a ninyo sila. Kon itugot sa Ginoo, manganhi kami dinhi, nga mag-ampo alang sa tanan. Tungod kay, mabati ko nga nagasugod na og lihok ang

kanang ikatulong pagbira, nakita n'yo, sa—sa sulod nako. Ug ako—ako—gusto ko nga mag—ampo alang sa tanan.

³² Karon moadto na kita, niining buntaga ngadto sa naandan na nato nga Kasulatan nga medyo nabasa ko tungod sa pagdalidali ko sa miaging gabii, ingon nga katulgon na kaayo, ug nagsulat og pipila ka dugang pa nga mga Kasulatan aron iuban niini. Ug daw sa usa kini ka paghatag og pasidungog. Nadungog ko ang usa ka igsoong lalaki, kaniadto, gamit kining teksto. Ug nahunahunaan ko . . . nga isulat ko kadto. Nahunahunaan ko, “Bueno, siguro kinahanglan isulat ko kini, ‘tungod kay basin moabot ang panahon nga magamit ko kini.’”

Daghang mga higayon nga ginabuhat nato kana. Namatikdan ko, nga daghan kaninyo dinhi, ang adunay papel. Ug mahimo nga adunay maisulti ang usa ka ministro, ug unya inyong—masabtan ninyo kana nga punto, may sa kung unsang butang ang mimakmak sa sulod ninyo. Ug dayon kung ang Espiritu Santo kana nga mao ang nagahimo niana, kung ingon—ana magsugod kang tukoron gikan niana sa mismong punto, usa ka mensahe alang sa Ginoo. Ug maayo kana. Nahimatikdan ko diha sa mga panagtigum, bisan asa ka moadto, tinuod nga nanggisulat ang mga magwawali ug ang mga tawo. Maayo kana. Kita—ania kita dinhi, mao kana ang atong gianhian, ang tinguhaon nga matabangan ang usa'g usa samtang ania kita sa niining mga dalanon.

³³ Ug karon ablihan na nato ang Pinadayag, sa ika-3 nga kapitulo, diha sa mga kapanahonan sa iglesia, ingon nga ginabalik-balik sa kapanahonan sa iglesia. Apan karon kita mga . . . kita . . . didto. Oo. Mahimo ko nga kuhaon kini nga usa ka teksto, ug pinaagi sa Espiritu Santo, magawali mahitungod Niini sa usa ka gatus ka tuig ug nga dili gayud maipagawas kung unsa ang unod Niini. Tungod kay, sa niini nga usa ka teksto, sama sa tanang uban nga mga teksto sa Biblia, Kini tanan nagkasumpay—sumpay.

Ug gusto ko nga kuhaon ang akong hilisgotan, niining buntaga, mahitungod sa: *Unsaon Ko Sa Pagdaug?* Karon, gipili ko kini tungod nga nahunahuna ko nga usa kini ka panahon nga dili gayud nato mahimong pasagdan nga mamatay ang Espiritu sa rebaybal. Kinahanglan nato nga magpabilin diha sa rebaybal, nga sa kanunay buhi, sa adlaw-adlaw. Miingon si Pablo nga kinahanglan niya nga “mamatay sa adlaw-adlaw, aron si Cristo mabuhi.” Ug kinahanglan dili gayud nato pasagdan nga mamatay ang rebaybal, sa sulod kanato.

Karon, Pinadayag, sa ika-3 nga kapitulo, ug sugod sa ika-21 nga bersekulo, mabasa nato kini.

Ang magamadaugon pagatugotan ko sa paglingkod sa akong trono uban kanako, maingon nga Ako . . .

nagmadaugon, *ug milingkod uban sa akong Amahan diha sa iyang trono.*

Siya nga may usa ka igdulungog, kinahanglan magpatalinghug sa sulti sa Espiritu ngadto sa mga iglesia.

³⁴ Nahimatikdan ba ninyo ang—ang pagkahan-ay niana? Kita n'yo? “Paglingkod sa Akong trono uban Kanako,” dili “*ibabaw* sa Akong trono.” “*Sa Akong trono,*” sa Iya kana nga gingharian. Kita n'yo? Ug didto, ingon nga—ingon nga si Cristo mao ang Pangulo, Pangulo diha sa trono sa niini nga panahon, sa tibuok gingharian sa Dios, maingon man nga kauban Niya ang Iglesia, kauban Niya ang Pangasaw-onon, sa Iyang trono, sa maong tibuok nga gingharian. Kita n'yo? Dili “*ibabaw* sa Akong trono,” kondili “*sa Akong trono,*” kita n'yo, sa kung asa aboton sa Iyang gingharian. Ang trono maoy nangibabaw sa gingharian, ug—ug ang gingharian moabot hangtud asa didto ang mga utlanan niini. Ug kini mogikan sa Eternidad hangtud sa Eternidad. Hunahunaa lang kini!

³⁵ Karon, sa diha nga nagatuon kita niini, ang tuyo ko niini dili lamang moanhi dinhi aron—aron sa pagpakig-fellowship uban kaninyo. Nga, gusto ko gayud nga buhaton kana. Apan kung—kung aduna man ako og higayon sa pagbuhat niana, moadto ako sa inyong balay, ug makiglamano ug makigsulti kaninyo, ug maglingkod, manihapon uban kaninyo; ug maglingkod, ilalum sa landong sa kahoy, ug makig-istorya ug magpakig-fellowship lang sa kadali.

Apan sa diha nga moanhi kita, ania kita dinhi alang sa usa ka piho nga katuyoan. Kini ang balay sa pagpanul-id. Kini mao ang trono. Kini mao ang trono sa Dios, ug nagagawas ang paghukom gikan sa balay sa Dios. Ug dinhi mao ang dapit diin kita nagakatipon, nagakatigum diha sa gugma, sa usa'g usa, ingon nga mga Cristohanon lamang ang makahimo og ingon-anang paghigugma. Apan, dinhi sa sulod, kita—kita nailalum sa—sa—sa—sa usa ka kapangulohan sa Balaang Espiritu. Ania sa atong taliwala ang Espiritu Santo. Ug ania kita dinhi aron nga mahimong. . . aron susihon ang atong mga kaugalingon, aron makita kung asa nga mga bahin kita nagkulang, ang atong kakulangan, ug kung unsaon nato nga maapas kung asa na unta kita, ngadto sa kung asa na angay kita karon; kung asa na ba kaha kita, ug ngadto sa kung asa na angay kita karon. Ug mao kana kon unsay atong tun-an. Ginatun-an sa mga ministro kana nga mga butang, alang sa ilang kongregasyon. Pag may makita sila sa maong kongregasyon, ang kakulang, dinha nila dayon sugdan.

³⁶ Karon, sa dili madugay, sa hunahuna ko kinahanglan nga ang iglesia medyo motikang og paitaas pa sa niini nga panahon. Wala ako'y plano nga himoon kini niining buntaga, sa pagpakita

niining mga butanga. Apan ako—sa hunahuna ko, taudtaod, kon itugot sa Ginoo, sa dili pa nato iwali ang mahitungod sa mga Trumpeta, gusto ko nga—nga—nga dalhon ang Iglesia sa usa ka butang nga—nga angay na ninyong masayran, sa akong pagtoo, karon.

³⁷ Ug nagahisgot kita karon mahitungod sa niining, “pagpangdaug.” Ang pulong nga *pagdaug*, siyempre, nasayod na mo kung unsa ang buot ipasabot niini. Kinahanglan aduna kamo’y butang nga pagadaugon. Ug kini nga kapanahonan sa iglesia nga ginahisgotan sa Espiritu Santo dinhi, sa Kapanahonan sa Iglesiang Laodicea, maingon nga bag-ohay lang nato natapos kini, nagkinahanglan kini og pagbadlong. Gikinahanglan mabadlong ang Laodicea, tungod sa iyang—pagsimang niini kang Cristo. Gipagawas niini si Cristo, diha sa—diha sa ilang kapanahonan. Ug si Cristo anaa na diha sa gawas, nagapaningkamot nga makabalik sa sulod. Mao kana’y gugma. Human nga gipagawas Siya gikan sa Iyang Kaugalingon nga balay, naningkamot aron makabalik sa sulod, ug miingon, “Siya nga mag-abli sa pultahan, kaniya mosulod Ako.” Kita n’yo? Ang iglesia, mismo, sa kinatibuk-an, gipagawas Siya.

³⁸ Apan karon himatikdi. Ang pagtawag Niya dinhi mao nga dili lang sa iglesia. “Kaniya nga magamadaugon.” Kita n’yo? Dili ang iglesia; mamahimong babaye unta kana, kita n’yo, ang lawas sa iglesia unta. Kondili “kaniya nga magamadaugon,” ang tagsa-tagsa ka tawo nga magmadaugon, ha.

³⁹ Ug ang Laodicea paabot na kini kaniya. Karon makita nato, kung ingon-ana, nasayod kita nga kini mao na ang Kapanahonan sa Laodicea, ug nasayod kita nga kini nga kapanahonan nagkinahanglan og usa ka grabe nga pagbadlong gikan sa Dios. Nagkinahanglan kini og usa ka grabe nga pagbadlong. Ug sa diha nga ang atong mga ministro nagkahuyang na ug mapasagdanon na, sama sa usa ka lolo ngadto sa iyang mga apo, nga kung unsa man ang buhaton nila saktong tanan. Ug sila’y . . .

⁴⁰ Daghang higayon nga gisulti sa una pa, nga ang Dios ingon ka maayo gayud nga Dios, hangtud nga gihimo na nila ang Dios nga usa na lamang ka dakung mapasagdanon nga lolo. Nakita n’yo? Apan dili Siya ingon niana. Usa Siya ka Amahan, ug usa ka Amahan sa pagkamatarung, sa pagpanul-id. Ug matul-iron sa kanunay ang gugma. Kita n’yo? Nagapanul-id ang gugma. Bisan unsa pa kini kasakit, nagapanul-id kini bisan pa man.

Ang usa ka tinuod nga inahan nagatul-id sa iyang mga anak. Ang usa ka tinuod nga papa nagapanul-id. Kita n’yo? Kung kamo huyang ug mapasagdanon, ug tugotan na lang kini . . .

⁴¹ Naagian ko ang usa ka karaang troso sa miaging adlaw, sa ubos sa usa—usa ka tubiganan, o unsa ang tawag nga usa ka agianan sa tubig. Ug milukso ako sa niini nga troso. Sa gawas, morag maayo kini tan-awon, mora og usa ka daku nga daan

na nga mahamis nga troso. Apan sa diha nga miambak ako sa ibabaw niini, oh, usa ka dakung sip-ak niini ang nahugno. Kini'y gabuk na gyud ug dunot. Miingon ko, "Nagakaingon niana na ang mga Cristohanon." Dugay na silang nangamatay diha sa sala ug kalapasan, ingon na kadugay, hangtud nga gabuk na. Dili nila masarangan ang unsa mang kabug-aton, gayud. Sila—wala sila masayod kon unsa ang buot ipasabot sa pagpangdaug. Ug kalit ko nahunahuna kini nga teksto, dayon. Ang pagpangdaug, ipapadayon ang Kinabuhi diha kaninyo. Pagmohawa na gani ang kinabuhi, mao kana ang nagpaingon-niadto sa troso. Kita n'yo? Ug kadto ang nagpadaut niini samot sa diha nga mapahigda kini didto kung asa ang tubig.

⁴² Ug dayon, dinha, makita mo ang usa ka Cristohanon, nga usa unta ka Cristohanon, pagmawala na gikan kaniya ang Kinabuhi sa Dios, ug ang kasinatian niini, ang kalipay sa pagpangalagad kang Cristo; ug, nagapasilong na lang diha sa usa ka iglesia nga diin may mga ingon-niana nga nagakahitabo, madoble pa ang kapasas sa pagkagabok niini, mismo, ang magkinabuhi ilalum niini.

⁴³ Busa, kung naningkamot man kita sa pagsunod sa niining Mensahe sa maong panahon, o bisan man lang ang bahin sa maong Mensahe, angay gyud nga kanunay kitang magkinabuhi diha sa Kinabuhi ni Cristo. Kita n'yo? Tungod kay, kung dili, nagtinaplan ka lang, ug nasayod ka na Niana, sa niining mga butang nga angay mong buhaton, ug wala kini buhata. Ang Biblia miingon, "Siya nga nasayod unsay matarung nga pagabuhaton, ug kana wala niya pagabuhata, kaniya kana sala." Kung ingon ana nahimo ka nang dunot, gabok, pagmahimulag ka gikan sa Kinabuhi sa Dios. Busa, pagpaningkamot kutob sa tanan nga mahimo mo, nga magpabilin diha sa Kinabuhi ni Cristo, aron mamahimo kang mabungahon.

⁴⁴ Makita nato kini nga kapanahonan nga atong gikinabuhian. Usa kini sa pinakahalangdong kapanahonan sa tanang mga kapanahonan. Kining Kapanahonan sa Iglesiang Laodicea mao ang pinakahalangdong sa tanang mga kapanahonan sa iglesia, tungod kay kini na ang katapusan sa panahon ug ang pagsulod sa Eternidad. Ug, dayon, kini mao ang pinakamakasala nga kapanahonan. Mas daghan nga kasalanan kini nga kapanahonan kaysa bisan unsa man sa nangaging mga kapanahonan. Ug ang mga gahum ni Satanas mao'y—mao'y makadaghang higayon nga mas lisud nga pakigbatokan kaysa bisan unsa man kaniadto nga kapanahonan. Kita n'yo? Ang karon!

⁴⁵ Didto kaniadto sa mga unang kapanahonan, mahimo ang usa ka Cristohanon, tungod sa iyang pagpahayag ingon nga usa ka iglesia . . . nga sakop ngadto kang Cristo, mahimong punggotan og ulo tungod niini. Mahimong patyon siya, ug mapalingkawas

gikan sa iyang kapit-os, ug makataliwan na aron sa pagtagbo sa Dios, dihadiha dayon.

Apan misulod na karon ang kaaway, diha sa ngalan sa iglesia, ug malimbongon kaayo kini. Kini mao ang dakung kapanahonan sa pagpanglimbong. Sa dihang, giingon na ni Cristo, “Sa katapusang mga adlaw mamahimong magkapareho na halos ang maong duha ka espiritu hangtud nga malimbongan niini ang Pinili kon mahimo pa.” Kita n’yo? Kita n’yo? Kita n’yo? Hinumdumi, si Cristo naghisingot mahitungod sa usa ka pinili nga mga tawo alang sa katapusan nga adlaw. Kita n’yo? “Malimbongan niini ang Pinili kon mahimo pa.” Magkapareho na halos! Ingon na niana magkinabuhi ang mga tawo, mahimong magkinabuhi ang mga tawo nga usa ka limpyo, balaan nga pagkinabuhi; dili makasasala, mga mananapaw, ug palahubog, ug mga bakakon, mga sugarol. Nga nagkinabuhi sila nga mas ibabaw pa niana, ug wala pa sa gihapon Niini. Husto kana.

⁴⁶ Kini ang—ang kapanahonan sa Kinabuhi, personal nga Kinabuhi ni Cristo, diin, ang—ang sangkap sa Iyang Lawas, maoy anaa diha Kaniya.

Una, ilalum sa pagpamatarung, sa bautismo sa tubig. Ikaduha, ilalum sa Pagkatawo pag-usab, diha kang Wesley, ang pagpakabalaan, nga nagahinlo. Ug ang ikatulo, ilalum sa bautismo sa Espiritu Santo, ang pagpahimutang na sa nianang gibalaan nga sudlanan ngadto sa pagpangalagad. Kita n’yo? Ang pulong nga pagbalaan *nagakahulogan*, usa kini ka Griyegong pinulongan nga may duha ka kahulogan “gilimpyohan ug gigahin alang sa pag-alagad,” gigahin alang sa pag-alagad. Karon ang Espiritu Santo ang nagapahimutang niini ngadto sa pagpangalagad. Kita n’yo?

⁴⁷ Ug mahimatikdan nato, “Sa diha nga ang mahugaw’ng espiritu makagula na gikan sa usa ka tawo, mosuroy kini latas sa mga dapit nga mamala.” Eksaktong ingon-niana ang gihimo sa iglesia, sa mga Baptist, sa mga Methodist, kadtong mga mitoo sa pagpakabalaan. “Dayon,” miingon si Jesus, “ang maong mahugaw nga espiritu nga migula, mobalik pag-usab sa niining lawas nga iglesia ug makaplagaan ang balay nga dinayandayanan, nahinloan na, nagkinabuhi nga putli, malimpyo nga pagkinabuhi.” Sige. “Apan unya kung kana nga balay dili napuno, okupado, nan siya mosulod nga uban na ang laing pito ka mga dautan nga mga demonyo nga labi pang dautan kay kaniya, ug ang katapusan nga yugto niining dapita mao nga pito ka pilo na kini ka labi pang dautan kay sa kung unsa kini kaniadto.” Mas maayo pa nga nagpabilin na lang unta sila nga Lutheran, kaysa dawaton niini kanang Kahayag ug mapakyas lang sa pagsunod Niini. Mao man usab ang mga Pentecostal, kita n’yo, kabalo na mo kung unsay akong pasabot, kinahanglan dinayandayanan na ang balay.

⁴⁸ Sa diha nga nakigsulti ako sa usa ka tawo, sa miaging adlaw, miingon, “Mainampingon kaayo sila, bisan diha sa daghang mga holiness nga grupo, nga dili tawgon ang Espiritu Santo, ‘Espiritu Santo,’ tungod nga basin mapaila nila ang ilang mga kaugalingon uban sa mga Pentecostal pag gibuhat nila kana. Moingon sila, ‘Balaang Espiritu,’ kita n’yo, ginalikayan nga makasulti og, ‘Espiritu Santo.’” Tungod kay, ang mga Pentecostal, nga ordinaryo lang nga mga tawo, ginatawag kini kung unsa ang giingon sa Biblia, nga “Espiritu Santo.” Nga, ang Balaang Espiritu ug ang Espiritu Santo mao ra. Apan mainampingon kaayo sila bahin niini. Dili nila gustong maila nga kauban sa niining mga tawo nga nanagsulti og laing-mga-dila; ug kana ang Balaang Espiritu, Mismo. Kita n’yo?

Unsa ang nahitabo kung ingon-ana? Sa diha nga ang kaaway, nga migula ilalum niadto sa pagpakabalaan, nga nabanlas pagawas, mibalik pag-usab ug nakaplagnan ang maong balay nga wala napuno sa Balaang Espiritu, karon ang kahimtang sa iglesia mao nga misalmot na kini uban sa—sa kapunongan sa mga simbahan, miapil na sa World Council of Churches. Ug ang kahimtang na niini karon ingon nga nakakonekta na kini sa Katolisismong Romano ug sa tanan na niining uban pa, ug karon pito na kini ka pilo nga labi pang dautan kaysa kaniadtong migawas kini gikan sa Lutheranism. Didto na niini ginadala sa tawo.

⁴⁹ Ug unya tan-awa ang Kapanahonan sa Iglesiang Laodicea human nga nadawat ang Espiritu Santo, ug uban ang kahibalo ug ang Espiritu sa Dios sulod Niini, ug dayon gisalikway niini ang mga buhat sa Dios, ug gitawag Kini nga “usa ka dautan nga buhat.” Kung ingon niana unsa man kana? Dinha na gipagawas si Cristo sa Iyang Kaugalingon nga iglesia. Kita n’yo? Siya. . . Wala gayud kini nagpakita Kaniya diha sa iglesia hangtud nga miabot sa Laodicea; ug sa dihang miabot na Siya sa Laodicea, gipagawas na Siya sa Iyang iglesia, naningkamot aron nga makasulod pag-usab.

⁵⁰ Karon, kita n’yo, ang pagpakamatarung wala pa nakapahisulod Kaniya. Gilimpyohan lang sa pagpakabalaan ang lugar alang Kaniya. Apan sa diha nga miabot na ang bautismo sa Balaang Espiritu, gipasulod Siya niini ngadto sa mga tawo. Ug karon gipagawas nila Siya, sa dihang gisugdan Niyang ipakita ang Iyang Kaugalingon, nga Siya mao sa gihapon kagahapon, karon, ug hangtud sa kahangturan. Gipalagpot nila Siya tungod kay nagdenominasyon na sila, ug ang—ang Espiritu sa Ginoo dili mouyon sa ilang pagdenominasyon. Nasabtan na ba ninyo karon? [Nagaingon ang kongregasyon, “Amen.”—Ed.] Sa niana, gipagawas nila Siya. “Dili nato gusto nga magkaaduna og unsa mang kahilambigitan sa niining mga pagbasa og hunahuna. Kini—kini iya sa yawa. Pagpanghimalad kini. O . . .” Kita n’yo?

Dili nila masabtan. “May mga mata, ug dili makakita; may mga igdulungog, ug dili makadungog.” Kita n’yo? Ginaablihan lamang sa Dios ang mga mata nga gusto Niyang ablihan. “Ginapagahi Niya kadtong gusto Niyang pagahion, kadtong mga gusto Niya, ug—ug—ug nagahatag og Kinabuhi sa kadtong Iyang gikahimut-an.” Mao kana kung unsa ang gisulti sa Kasulatan.

⁵¹ Karon, makita nato kining mga oras nga atong gikahimutangan, ang yugto niini, ug makita nato kung unsa na kini. Ug ginabadlong sa Espiritu Santo ang kapanahonan nga nagpalagpot sa Iya. Apan, bisan pa sa tanan niana, nahimatikdan ba ninyo, “Kaniya nga nagmadaugon”? [Nagaingon ang kongregasyon, “Amen.”—Ed.] Bisan pa sa nianang kalibutanon, makasasala nga kapanahonan sa iglesia adunay, “Siya nga nagmadaugon.”

⁵² Makita nato dinhi nga sa kanunay aduna gyud ang Dios og mga mananaug. Aduna Siya’y mga mananaug sa matag kapanahonan. Aduna gyud kanunay, sa matag panahon, sa matag kapanahonan nga nagkaaduna sa yuta, aduna gyud ang Dios sa kanunay og tawo nga magamit Niya, ingon nga usa ka saksi sa yuta. Wala gayud sukad nga wala Siya og usa ka saksi, bisan nga usahay usa lang. Apan aduna og mananaug, gayud, sama sa mga balaan sa kaniadto.

⁵³ Ug ang—usa ka maayo kaayong tawo, usa ka eskolar, nag-ingon, human sa *Ang Pito ka mga Selyo*, miingon siya, “Igsoong Branham, ikaw ingon nga—usa ka tigtipo, magtitipo, diay,” miingon, “Unsaon mo man pagpahimutang niining Iglesia diha sa Pagsakgaw nga dili moagi og panahon sa dakung Kasakitan, diha sa usa ka pagtipo?” Siya miingon. . .

Makita ninyo, kung usa kini ka tipo, kinahanglan adunay usa ka. . . kinahanglan gyud nga adunay. . . Kung adunay usa ka anti-tipo, siguradong adunay usa ka tipo aron adunay kagikanan kana nga anti-tipo. Ug ang tanan nga ginasulti ko, nga maoy tinuod, adunay tipo. Aduna kini og tipo. Aduna para kaninyo og landong. Ug nag-ingon ang Biblia, “Ang daang mga butang nga landong lamang sa bag-ong mga butang nga umalabut.”

Miingon siya, “Apan karon gikuha man nimo ang Daang Tugon ingon nga sa usa ka landong. Karon,” miingon siya, “unsa na ma’y imong buhaton sa niining Iglesia?”

⁵⁴ Kini nga tawo gikan sa usa ka. . . Usa ka inila nga tawo, usa ka bantugan nga magtutudlo nga usa ka suod ko nga higala, maayo kaayo nga tawo, ug siya usa ka hiligugmaon nga igsoon. Ako—dili ko mangahas sa pagsulti og usa ka pulong batok sa maong igsoon. Dili nako buhaton, sa unsa mang paagi. Ingon—ingon nga usa ka. . . Ingon nga usa ka Cristohanon, dili ako mosulti og unsa man batok kaniya. Siya—siya—dili man siya mouyon kanako bahin niadtong usa ka hilisgotan, pero siya—bilihon ko siyang igsoon. Magkauban kami nga mangaon.

Ug, oh, buutan kaayo siya nga tawo. Ginadawat ko ang iyang magasin, ginabasa ang iyang mga artikulo. Ug mosulat pud siya og pipila para kanako, ug uban pa. Ug nakakuha ako og daghang mga teksto gikan sa kung unsay akong—akong nabasa—nabasa sa iyang mga artikulo, sa mga nadungog nga gipanulti niya. Siya usa ka inila nga tawo, pero siya—siya dili lang makauyon kanako. Ginadayeg ko kanang, iyang pagkasinsero. Bisan pa man nga dili siya nga basta nalang, usa sa niining mga masayon-sayon, nga mouyon-uyon nalang sa tanan nga imong isulti. Aduna siya’y kaugalingon mismong kombiksyon, ug ginabarugan niya kini. Ginadayeg ko kana. Ug usa siya ka buotan nga tawo. Oh, ako—dili ako usa ka magtutudlo o eskolar, man lang, apan kini nga tawo parehong magtutudlo ug eskolar.

⁵⁵ Apan ako—dili ako makauyon sa iya, kay dili ko man makita kini. Apan, wala kini kalabutan sa kaluwasan, may kalabutan kini mahitungod sa Pag-anhi sa Ginoo. Makita niya nga kinahanglan moagi kono ang Iglesia sa panahon sa dakung Kasakitan, aron nga maputli. Maingon ko nga ang Dugo ni Jesus Cristo mao ang nagapaputli sa Iglesia. Kita n’yo? Wala na kini nagkinahanglan og. . .

Nagatoo ako nga ang iglesia moagi gayud sa panahon sa dakung Kasakitan, ang organisasyong iglesia, apan dili ang Pangasaw-onon. Mamili ka ba og usa ka babaye nga kinahanglan mo unang maputli ayha mo siya pangasaw-on? Kita n’yo? Pinili ang Pangasaw-onon ni Cristo, ug Siya gayu’y gipili. Ug Siya mao ang Pangasaw-onon sa Dios, ang Pangasaw-onon ni Jesus Cristo.

⁵⁶ Ug karon miingon siya, “Unsaon mo man pagtipo niana, kung moadto na ang Pangasaw-onon, pagalalinon na Siya nga dili pa Siya moagi og panahon sa dakung Kasakitan?” Ingon pa, “Aduna ako’y Kasulatan nga magpakita kanimong moagi sa panahon sa Kasakitan ang Iglesia.”

Ingon ko, “Basahon mo nalang ang Ikaunom nga Selyo, kana lang, nga mapailalum siya mismo sa panahon sa Kasakitan. Apan mahibaloan mo, nga sa dili pa mahitabo kana, gisakgaw na ang Pangasaw-onon. Kita n’yo? Atua na Siya sa Himaya nianang panahona. Wala siya magpahinlo.” Kita n’yo?

“Siya nga nagatoo Kanako may Kinabuhi nga walay katapusan, ug dili pagahukman sa silot o moagi sa Paghukom, kondili miagi na gikan sa kamatayon ngadto sa Kinabuhi.” Nagsaad na si Cristo nga dili gayud kita moatubang og Paghukom. Matugtanon kaayo Niyang gikuha ang akong lugar, hangtud nga hingpit akong mapalingkawas. Sa dihang gipasaylo ako, napasaylo gyud ako. Unsaon man Niya pagpahigawas kanako sa prendahanan, nga klarong adunay resibo, kon. . . Unsaon man Niya pagkahimong akong Manunubos, ug tubuson ako gikan sa prendahanan, ug moingon sa gihapon ang ahente

nga gipanag-iyahan niya ako? Aduna na ako'y sinulat nga resibo, amen, kita n'yo, nga sinulat sa Dugo ni Jesus Cristo. Kita n'yo? Karon, diha niana, kon diin kita nagaduol.

Miingon siya, “Karon, unsaon mo man sa paghimo, nga mahimulag kanang pinili nga Pangasaw-onon nga gihisgotan mo karon, unsaon mo sa pagpahimutang Niana ilalum sa usa ka pag-tipo?”

⁵⁷ Ingon ko, “Maayo kaayo.” Ingon ko, “Ania na. Karon, diha sa Mateo, ang ika-27 nga kapitulo ug sa ika-51 nga bersekulo.” Kung atong . . .

Tugoti nga basahon ko lang kini, ug dayon atong—atong makuha og ayo kini. Unya makita nato kung mitipo ba kini o wala, kung kini ba mao ang pinili nga Pangasaw-onon. Mateo, ang ika-27 nga kapitulo ug sa—ug sa ika-51 nga bersekulo. Sige. Mabasa nato kini, sa paglansang sa atong Ginoo.

Ug, ania karon, ang tabil sa templo nagilis sa duha ka bahin gikan sa ibabaw ngadto sa ubos; . . .

⁵⁸ Karon, mao kadto ang balaod. Didto mismo nagtapos ang balaod. Tungod kay, ginapahimulag kaniadto sa maong tabil ang kongregasyon gikan sa mga balaang mga butang sa Dios. Ang dinihogan nga sacerdote lamang ang makasulod didto, ug, nga, kausa lang sa usa ka tuig. Mahinumduman ba ninyo? [Nagaingon ang kongregasyon, “Amen.”—Ed.] Karon, ang Dios, sa Iyang Kaugalingong kamot, himatikdi, “gikan sa ibabaw ngadto sa ubos,” dili gikan sa ubos ngadto sa ibabaw. Kini mga kuwarenta-ka-piye ang kahabugon. Himatikdi, dili gikan sa ubos ngadto sa ibabaw, kondili “gikan sa ibabaw ngadto sa ubos,” nagpakita nga ang Dios ang naghimo niadto. Nagilis ang tabil sa duha, unya bisan pa man, ang bisan kinsa, kinsa man nga gusto, mahimo nang moduol ug moambit sa Iyang pagkabalaan. Kita n'yo? Bueno.

. . . gikan sa ibabaw ngadto sa ubos; ug ang yuta nauyog, ug nangabuak ang mga batong bantilis;

Ug nangaukab ang mga lubnganan; ug daghan nga lawas sa mga balaan nga nangatulog nangabanhaw,

Ug sa nanggula sa mga lubnganan sa tapos sa iyang pagkabanhaw, . . . nangadto sila sa ciudad nga balaan, ug nanagpakita ngadto sa daghan.

⁵⁹ Kana ang maong Mga Pinili, kadtong Pangasaw-onon. Dili tanang iglesiang Judio ang ningbangon niadtong panahona. Ang tanan kanila naghimo sa mao ra nga halad-nga-sinunog. Ang tanan kanila napailalum sa giula nga dugo sa maong cordero. Apan adunay usa ka piniling Pundok; ug ang kanang piniling Pundok, sa dihang miabot na mismo ang panghitabo, nga nagtoo gayud Niini nga may pagkamatinuuron. Karon moadto na ako sa pulong nga *pagdaug*. Karon dinha lang usa. Kini nga mga

tinuod nga nagmadaugon, matinuuron nga ginabuhay ang maorang halad nga gibuhay sa uban pa kanila, apan, diha sa pagkamatinuuron, gidaug ang mga butang nga iya sa kalibutan. Sa dihang gihimo ang hustong halad pagpasig-uli alang kanila, atua sila sa paraiso hangtud nahitabo kadto nga drama niadtong panahona. Sa dihang miabot kadto nga higayon, nagmadaugon na sila ug nakapahulay na, nga nangatulog; kita n'yo, “daghang mga lawas sa niadtong mga nangatulog nga anaa sa abog,” kita n'yo, nangatulog.

⁶⁰ Karon, kung aduna pa kita og oras, mahimong padayonon nato balik kang Daniel, niadtong, si Daniel, kadtong usa ka pinili nga nagmadaugon. Ug miingon Siya, “Takpi ang Basahon, Daniel, kay ikaw mopahulay diha sa kalipayan sa imong bahin. Apan sa pag-abot sa Prinsipe, nga magabarug alang sa mga katawhan, motindog ka diha nianang bahin.” Ania na. Si Daniel, kining propeta sa Dios, nga nakita na ang umalabot nga katapusan. Ug miingon Siya, “Daniel, motindog ka diha sa imong bahin nianang adlaw.” Ug ania na siya, nga nagabangon; dili tanan sa Israel, kondili ang Pangasaw-onon nga matang nga gikan sa Israel. Karon, ang uban pa sa Israel dili manggibangon hangtud sa pangkinatibuk-an na nga pagkabanhaw.

⁶¹ Ug karon, sa Pag-anhi ni Ginoong Jesus, kadtong mga tinuod gyud nga nahigugma sa Iyang Pag-anhi, nga nagakinabuhay alang niini; pag Siya motungha na diha sa kawanangan, ang Iglesia nga nangamatay diha kang Cristo mangabanhaw, ug ang mga buhi pagaalid-an sa kalit. Ang tanang uban pa dili makahibalo mahitungod niini. Hinumdumi, “Nagpakita ngadto sa mga anaa sa ciudad.” Kita n'yo? Ang—ang—ang Pagsakgaw mamahimong sama niana. Makita nato ang usa'g usa, ug makita nato sila. Ang tanang uban pa sa kalibutan dili makakita kanila. Pagasakgawon kini ingon nga usa ka sekreto nga pagbiya. Nagahulat alang nianang orasa!

Mangbalik dayon sa kalibutan para sa nianang mahimayaon nga Milenyum, dayon ang linibo ka tuig. . . “Ang uban sa mga nangamatay dili mabuhi sulod sa usa ka libo ka tuig.”

⁶² Ug dayon mangbangon sila diha sa pangkinatibuk-an na nga pagkabanhaw, kon diin, ang tanang Israel. Ug usab, tan-awa ninyo dinha, ang dose ka apostoles, ang dose ka patriarca, tanan girepresentar. Ug wala pa nato kana nahisgotan. Siguro, kon itugot sa Ginoong, pagahisgotan nato kini diha na sa maong Tugon, kung giunsa nga ang kadtong kuta nga bato nga jaspe, ug ang dose ka bato, dose ka mga ganghaan, dose ka patukoranan, ang tanan sa mga niini girepresentar. Ania na sila sa maong dose ka lingkoranan nga harianon, ang mga manolundang-mensahero sa niadtong mga adlaw, aron hukman ang mga nagsalikway sa ilang mensahe. Amen. Kana ang moabot nga makuyaw nga takna. Oo.

⁶³ Daw sa unsa nga adlaw, daw sa unsa nga panahon nga atong ginapuy-an! Unsa nga kinahanglan na nato nga magmasusihon, Iglesia. Ginahisgotan nato karon ang mahitungod sa niining mga butang nga umalabot, nga taliabot. Karon, sa niining adlaw, balikan nato dinhi ug tan-awon, susihon ang atong mga kaugalingon ug tan-awon kon kita anaa na ba sa mismong Pagtoo.

⁶⁴ Karon hisgotan nato ang pipila ka mga magdadaug alang sa pipila ka minuto, niadtong mga adlaw sa panahon ni Noe, nga tipo kaniadto ni Jesus Cristo, ingon nga sama sa karong panahon.

Unta mga napulo lang ka minuto. Karon mogahin gyud ko og tunga sa oras. Nagasugod pa lang ako, sa unang pahina. Laktawan ko na lang ang pipila sa mga niini, kung mahimo ko. Ug hisgotan kung unsa ang . . .

⁶⁵ Niadtong panahon ni Noe, tipo sa karon nga panahon: gipahanungdan kini ni Jesus, ug miingon, “Maingon sa nahitabo kaniadto sa mga adlaw ni Noe, maingon man usab sa Pag-abot sa Anak sa tawo. Sa mga adlaw ni Noe, maingon man usab sa Pag-abot sa Anak sa tawo.” Himatikdi, silang tanan kaniadto sa wala pa ang paglunop sa tibuok kalibutan, nga minilyon na ka mga tawo tingali, adunay walo lang kaniadto nga nagmadaugon. Walo ka mga tawo ang nagmadaugon, nga matitud-anon, lunsay gayud nga magdadaug. Didto ang tulo ka mga anak nga lalaki ni Noe ug ang ilang mga asawa, ug si Noe ug ang iyang asawa. Walo ang nagmadaugon, nga nakasulod sa arka sa gikatakang panahon. Giunsa man nila sa paghimo niadtong? Nagpatalinghug sila sa Pulong sa Dios. Wala sila hingkaplagi nga didto sa gawas sa pultahan. Nakaplagan sila nga didto sa sulod sa pultahan.

⁶⁶ Oh, minahal kong mga higala, ayaw pasagdi nga masaradohan ka nianang pultahan. Miingon si Jesus, “Maingon sa nahitabo niadtong adlaw, maingon man usab sa Pag-abot sa Anak sa tawo.” (Salamat, igsoon.) “Maingon man usab sa Pag-abot sa Anak sa tawo.” Karon, aduna gyu’y tawo nga mahikaplagan nga atua sa gawas sa nianang pultahan.

Daghan kanila tingali adunay maayong katuyoan, ug, “Sa umalabot, kung mahitabo man ang ingon niana nga butang, mosulod kami kauban ni Igsoong Noe, tungod kay usa siya ka maayo nga tawo.” Apan, nakita n’yo, nakaplagan nga walo lang ang nakasulod.

⁶⁷ Karon, hunahunaa og ayo. Kung nagtinapulan kamo, nga nagpatuyang, pag-sulod na mo. Sa madali, dayon, tungod mahimo nga isarado na unya ang pultahan sa unsa mang oras.

⁶⁸ Ug aduna sa kanunay og arka diha sa ekonomya sa Dios. Adunay arka niadtong mga adlaw ni Noe, aron sa pagluwas sa Iyang katawhan. Adunay arka niadtong mga adlaw sa balaod,

ang arka sa pagpamatuod. Niadtong mga adlaw sa balaod, nagasunod sila sa arka.

Ug aduna karon og pang-ikatulong dispensasyon; sama sa panahon ni Noe, sa panahon ni Lot, ug sa niining panahon karon. Adunay usa ka arka sa karon. Ug kana nga arka dili usa ka denominasyon, ni dili usab kini og usa ka maayong buhat nga imong ginahimo. Kini “pinaagi sa usa ra ka Espiritu,” Mga Taga-Roma 8:1, “kitang tanan gibautismohan ngadto sa usa ra ka Lawas, ang ginsakupan nianang Ginghamian, usa ka Espirituhanong bautismo.” Bisan unsa pa ka maayo, unsa pa ka dautan, bisan unsa pa man, anaa ikaw sa Ginghamian pinaagi—pinaagi sa bautismo sa Espiritu Santo. Kita n’yo? Sa nianang paagi lang kamo magmadaugon. Ang mga nagapailalum lang sa giula nga Dugo ang maoy mga magdadaug, tungod kay dili ka magmadaugon, sa kaugalingon mo. Siya ang nagapangdaug alang kanimo. Gapahulay ka na lang.

⁶⁹ “Unsaon ko man sa pagkasayod kung ingon niana, Igsoong Branham, nga nakasulod na ako Dinha?” Bantayi kung unsa nga matang sa kinabuhi ang imong gikinabuhi. Pagtan-aw tan-aw sa palibot. Susiha kung nagkinabuhi ka ba, nga dili-tinuyo. O, kinahanglan mo pang manglimbasog ug pugson, kita n’yo, kung ingon-ana ikaw ang nagahimo niana. Apan ayaw paninguhaa nga buhaton kini. Ginapugos mo ba gyud? Oo. Ayaw pugsa.

⁷⁰ Sama lang sa pagpapasulod sa kamot sa gamay’ng bata ngadto sa bukton sa sinina niini, nakita ninyo. Itaas niya, ipaubos, ipaibabaw, ug tanan na. Kita n’yo? Dili niya kini mahimo. “Isul-ob ang imong sinina, anak.” Dili niya mahimo kini. Ipataas niya ang gamay niyang bukton, ipaubos, magkabali-baliktad. Nanginahanglan kini sa imong malig-on nga kamot.

Oh, daw sa unsa ako ka malipayon, nga itugyan ko lang ang akong mga kamot ngadto sa Amahan, moingon, “Ginoong Jesus, dili ako makasulod Dinha. Tabangi ako. Isul-ob ang sinina kanako.” Giundang ko na ang mga pagpaningkamot. Pasagdi lang nga Siya ang mohimo niini. Kita n’yo?

⁷¹ Kung padayon nga paninguhaon sa maong gamay’ng bata, “Oh, mahimo ko kini. Mahimo ko kini.” Ug bisan asa na niya gisul-ob. Dili niya kini mahimo.

Dili ninyo usab mahimo, ni ako man, apan kung mosalig lamang kita ug pasagdan Siya nga mohimo niini. Itugyan mo lang ngadto Kaniya, “Ania, Ginoo, ania ako. Tugoti—lang ako nga wala gayu’y mahimo. Akong—akong ginatugyan. Ibutang Mo ang akong kamot sa hustong dapit.” Mao kana ang kadaugan. Mao kana ang nagamadaugon.

⁷² Ang butang nga inyo kinahanglan daugon mao ang inyong kaugalingon, ang inyong mga ideya, ang inyong butang, ug

isurender ang inyong kaugalingon ngadto Kaniya. Siya ang nagapangdaug alang kaninyo. Kabalo Siya sa dalan; kita wala.

⁷³ Apan sa panahon ni Noe may walo ka magdadaug, ug mao lang kadto ang nakasulod. Hingkaplagan sila nga anaa sa sulod.

Karon tan-awa, mga higala. Nagatoo ako nga gina-teyp nila kini. Ug kung anaa man kini sa telebisyon, o dili sa tel... pasayloa ako, sa teyp. Unsa man ang inyong ginahimo, kung kinsa man ang nagapaminaw karon, o kung kinsa man ang maminaw pagkahuman niini, ulahi na kaayo ang takna, ug aduna man kamo og maayong katuyoan, apan kinahanglan nga makaplagan kamo nga anaa sa sulod. Karon, ayaw kamo pakigbisog. “Kini dili sa kabubut-on sa tawo, o kaniya nga nagapaningkamot, kondili sumala sa Dios.” Pasagdi lang ang Dios. Itugyan lang ang inyong kaugalingon ngadto Kaniya ug magpadayon, nga may hingpit, may igo nga pagtoo, nga, “Mahimong tumanon sa Dios kung unsa man ang Iyang saad.” Dili sa pagpamiyembro sa usa ka denominasyon, sa usa pa ka denominasyon, ang pagdangop *niini*, *niana*, o sa *uban pa*, o ginasulayan ang *ingon-imi*. Itugyan lang ang inyong kaugalingon ngadto sa Dios, ug magalakaw nga kauban Siya, nga may pakigdait, malinawon, nga walay mga kahingawa. Padayon lang nga nagalakaw nga uban Siya. Husto kana.

⁷⁴ Mao kana ang akong gisulti sa atong igsoon nga bag-ohay lang nagkanerbiyos. Kita n’yo? “Itugyan lang ngadto Kaniya. Ania Siya, Siya Nga nasayod sa kung unsa ang imong mga gipangbuhat, ug kung unsa ang hinungdan sa imong pagkaingon-ana ug nga ginabuhat ang *ingon-niana*, ug ang tanan niana. Nasayran Niya ang tanan mahitungod kanimo ug karon ginasulti lang Niya kanimo kung unsa ang angay buhaton. Karon,” ingon ko, “ang bugtong butang lang nga angay mong buhaton mao ang buhaton lang kini. Kanang, kalimtan ang tanan mahitungod sa mga nangagi na, magpadayon, magkinabuhi para sa umalabot, diha sa Himaya ug sa Presensiya sa Dios.”

Walong mga magdadaug.

⁷⁵ Niadtong mga adlaw sa panahon ni Daniel, adunay upat ka mga magdadaug nga makahimong mobarug sa pagsulay sa kalayo ug leon.

Karon, makalaum kita nga pagasulayan gayud. Usa kana ka leksyon para sa akong—akong igsoon nga anaa diha sa likod, usab. “Siya nga nagaduol sa Dios kinahanglan nga masulayan siya una.” Masulayan (sa unsa?) sa Pulong. Mao kana ang pagsulay nga iya sa Dios. Nagatoo ba kamo niini? [Nagaingon ang kongregasyon, “Amen.”—Ed.] “Siya nga nagaduol sa Dios kinahanglan nga masulayan.” Ginapakita lamang niana ang usa ka tinuod nga anak, kung ingon-ana, kita n’yo, kinahanglan nga masulayan. Ug pag moabot na ang pagsulay... Dili ka

magmadaugon gawas nga adunay usa ka pagsulay nga gihatag nganha kanimo. Ug pag-gihatag ang pagsulay, kini aron makita kung magmadaugon ka ba o dili. Ug miingon si Jesus, “Kaniya nga nagmadaugon,” sa pagsulay. Ang pagsulay mao ang pinakahalangdong butang nga sukad nahitabo kanimo. Nagatoo ako nga nahisulat kini diha sa Kasulatan, miingon si Pedro, nga, “Ang atong pagsulay labi pa kamahinungdanon sa ato kaysa hamiling bulawan.” Panahon kini sa pagsulay. Usa kini ka maayong ebidensiya kanato nga anaa kanato ang Dios, pag-ginasulayan kita, tungod nga ang tanang mga anak sa Dios ginasulayan ug ginapamatud-an.

⁷⁶ Ug si Daniel, usa ka lalaki, usa ka propeta; Si Sadrach; Mesach; ug Abed-nego; Si Daniel mao ang propeta; ug mao kadto ang gidaghanon sa Iglesia niadtong panahona, ang buot kong ipasabot, ang Pangasaw-onon. Daghan ang iglesia, mga duha ka milyon kanila ang miadto didto. Apan aduna og. . .Mao kadto ang gidaghanon sa mga nagmadaugon. Ug sila nga mga magdadaug didto gisulayan. Ug ang matag magdadaug kinahanglan nga pagasulayan. Ug sa diha nga miingon sila, “Isalikway ninyo kung unsa ang ginasulti sa Pulong, o kay kondili itambog kamo ngadto sa nagdilaab nga hudno,” gisalikway na nila ang tanang butang gawas lamang sa Pulong.

⁷⁷ Ug sa dihang gisulayan si Daniel, nga kinahanglan bakwion niya kung unsay gisulti sa Pulong, nga nag-ingon nga kinahanglan nilang moyukbo paatubang ngadto sa templo, sama sa pag-ampo ni Solomon, ug Iya silang luwason gikan sa tanan nga mga butang. Magapatalinghug ang Dios gikan sa Langit kung manggiyukbo sila. . . molantaw ngadto sa templo ug mag-ampo. Ug miingon, “Kung ang si kinsa man nga mag-ampo sulod niining mga adlaw. . . Ug kaming mga Medo-Persian, wala nagausab sa among mga balaod. Kana nga tawo igatambog ngadto sa langub sa mga leon.”

⁷⁸ Nag-andam sila og usa ka lit-ag para kaniya. Nagtoo ako nga nahibal-an na kadto sa maong propeta. Apan nag-andam na sila og usa ka lit-ag para kaniya. Milakaw siya nga mapainubsanon. Sa diha nga miabot na ang oras aron nga mag-ampo siya. . . Sa dihang, nahibalo siya, nga didto sa ilang lugar sa Jerusalem, adunay usa ka halad nga sinunog ibabaw sa halaran. Wala nahadlok si Daniel sa maong mga tigpaniid. Gipataas ang salimbong, ug giduso ang mga alambreira sa bintana, ug miluhod dayon siya, ug gipataas ang iyang mga kamot ngadto sa Dios ug nag-ampo. Ngano man? Mabuhi man o mamatay, anaa na kaniya ang kadaugan. Ug, busa, ingon ka daku nga kadaugan hangtud nga dili siya mahimong kaonon sa mga leon. Siya—nagmadaugon siya.

⁷⁹ Ang. . . Sila Sadrach, Mesach, Abednego nagkaaduna og ingon ka daku nga kadaugan hangtud ang leon. . . hangtud nga

dili sila mahimong sunogon sa kalayo. Kabalo mo, ang kadaugan usa ka butang nga malisud agdawon, o ut-uton, o unsa man. Kita n'yo? Busa, sila, naangkon nila kadto.

⁸⁰ Maghisgot ako og usa pa ka personahe. Sa mga adlaw ni Lot, gihisgotan kini ni Jesus, nga adunay tulo lamang nga nagmadaugon, si Lot ug ang iyang duha ka mga anak nga babaye. Bisan gani ang iyang asawa; wala nagmadaugon. Siya—nakagawas siya. Usa siya ka tipo. Unta aduna pa kita og oras. Human na ang traynta minutos ko karon. Kita n'yo? Kita n'yo? Siya, okay pa siya niadto, migawas siya.

⁸¹ Karon kinahanglan kong ihatag kini kaninyo, sa makadiyut lang. Daghan kaninyo ang ninggawas, usab. Daghan kaninyo ang ningbiya sa niinyong mga butang, aron inyong mabarugan, pagkahuman nga inyong masusi Kini sa Kasulatan ug nakaplagan Kini nga husto. Nakita ninyo ang kapanghimatuuran sa Makagagahum nga Dios; dili ni kinsa man, sa kung unsa ang *gisulti* ni kinsa man ingon nga usa ka kapanghimatuuran. Kung unsa ang *gisulti* sa Biblia nga mahitabo, ug ania Kini nga ginapahitabo kini. Nakita ninyo nga Kini mao ang Kamatuuran. Mao nga, nagdesisyon kamong mogawas, aron biyaan ang Sodoma, biyaan ang denominasyon, biyaan ang mga butang nga naggapus kaninyo ngadto sa kredo; ug aron sa pagsunod kang Cristo, pinaagi sa Espiritu Santo nga ginapanghimatud-an ang Kaugalingon Niya pinaagi sa mga sinulat nga Pulong sa Dios. Sa laing pagkasulti, gipili ninyo ang Biblia kaysa ang kredo. Nagdesisyon kamong mogawas, aron mosunod.

⁸² Bueno, mao usab ang gibuhad sa asawa ni Lot, kabalo na mo. Nagdesisyon siyang mogawas, aron mouban kang Lot, mosunod sa iyang bana, sa iyang mga anak, sa iyang mga minahal sa kinabuhi, apan wala Kini nagagikan sa iyang kasingkasing. Gimahal niya sa gihapon ang kalibutan. Busa posible nga mahimo mong sugdan, ug anaa sa gihapon ang pagka-kalibutanon sa sulod mo. Kita n'yo? Wala gayud siya nagmadaugon. Ug bisan tuod nga didto na siya sa iyang dalan, sa katapusan gipalagpot siya niini. Kinahanglan niya kaniadtong buhaton kadtong usa ka daku, hataas, katapusan nga paglantaw. Didto siya nasakpan. Ayaw gayud bisan sa paglingi man lang. Wala na'y mga kailibgon. Magpadayon lang. Isentro ang imong hunahuna ngadto sa Kalbaryo ug magpadayon sa pagsulong paingon kang Cristo. Kita n'yo?

⁸³ Misugod siya, ingon nga usa ka magdadaug, apan wala gayud siya nagmadaugon. Oh, gibiyaan niya ang denominasyon. Gihimo gyud niya. Migawas siya sa Sodoma, kauban si Lot. Apan gusto niyang mobalik ug paputlan ang iyang buhok. Kabalo na mo kung unsa ang buot kong ipasabot. Kita n'yo? Gikinahanglan niyang mobalik. Dili gyud niya mahimo nga antuson ang—ang pagsulay. Gikinahanglan niyang molingi pag-

usab, aron lantawon kung unsa ang ginahimo sa uban pa kanila. “Oh, kabalo mo, daghan pa ako og mga maayong higala nga atua didto, bisan pa man. Ug, luyo nianang tanan, mahimong usa lang kini ka gamay’ng—gamay’ng paglihok. Wala ko kabalo kung husto ba gyud kini o dili. Ako—tungod lang man kini sa sulti sa niining lalaki, bisan tuod siya ang akong bana. Apan bisan pa niana. . .” Ang pastor nimo mao ang imong bana, sa espirituhanon nga pagkasulti, nakita n’yo. “Karon, kung husto man kini o dili, wala ako kabalo. Tingali siya, dili husto ang iyahang kapadayagan.”

Dayon, wala ka niini bug-os nga natagbaw, dili nimo tiunay nahibaloan nga Kini mao ang Pulong sa Dios, kung ingon niana—kung ingon niana dili ka makapadayon. Kita n’yo? Kinahanglan nga kombinsido gyud ka. Kinahanglan nga nahibaloan mo gyud. Dili lang nga basta isulti, “Bueno, nakita ko ang uban nga nagahimo niini. Nakakita ko og usa ka ilhanan.”

⁸⁴ Kabalo mo, ninggawas ang Israel, mahimo kong isulti ang mao rang butang ug iaplikar kini sa karon. Ninggawas sila, nga duha ka milyon ang gidaghanon, ug misangpot sa duha na lang ka tawo. Husto. Nakita nila ang mga buhat sa Dios. Nakita nila ang pagpadayag sa Espiritu. Nakita nila ang mga halangdon, gamhanan nga mga milagro nga gihimo didto kaniadto sa Egipto, ug ang tanan na, ug ningsugod sa paggawas. Apan kadto—dili kadto kinasingkasing. Wala sila nagmadaugon. Nanggawas lang sila. Ug miingon si Jesus, “Ug nangamatay sila didto sa kamingawan,” ug nangamatay ngadto sa Walay Katapusan. “Ang tagsatagsa kanila nangamatay,” buot ipasabot niini nga Walay Katapusan nga pagkahimulag. Ang tagsatagsa kanila nangadugta didto sa kamingawan.

⁸⁵ Pero adunay duha ka tawo kaniadto, si Josue ug si Caleb. Ug sa diha nga miabot na kadto sa pagpakigsangka, pagkadaku sa babag hangtud nga sama sa daw mga dulon na lang sila pag-itapad sila. Misinggit si Josue uban ni Caleb, ug miingon, “Kita labaw pang makahimo niini.” Ngano man? “Tungod kay gisulti na sa Dios.” Ug mga magdadaug sila. Nagmadaugon sila. Sila kadto ang mga bulahan, gikan niadtong tibuok nga organisasyon sa mga tawo, aron dalhon ang tinuod, pinili nga Pangasaw-onon padulong ngadto sa yutang saad. Si Josue ug Caleb nga atua didto sa pinakaunahan, ingon nga mao ang duha ka heneral, ang nanguna kanila mismo ngadto sa suba, ug gitabok ang maong suba, padulong didto sa yutang saad. Ngano man? Gitoohan nila ang Pulong, bisan unsa pa man.

⁸⁶ Dayon, mitungha si Dathan. Dathan, ang pasabot ko, mibarug, ug ingon man si Korah, ug gipaningkamotan nila nga ingnon, “Ginapamugos sa niining tawhana nga himoon ang iyang kaugalingon nga labaw sa tanan kanato; nga mas balaan siya kay sa tanan kanato.” Human nga gipanghimatud-an na sa Dios sa hingpit ang maong tawo. Miingon sila, “Magasugod na

lamang kita og usa ka grupo sa mga tawo ug himoon nato ang *ingon niini*, *ingon niana*, o ang *uban pa*, ug maghimo kita sa atong mga organisasyon, atong himoon . . .” Ug nangamatay sila ug nangalaglag.

Apan kadtong mga tawo nga aduna niadtong Pulong sa Ginoo, ug mipabilin diha Niini, ug sila ang nakatabok.

“Dili ang si kinsa nga nagasugod; ang si kinsa nga nagahuman.” Daghan ang nagasugod sa lumba, apan adunay Usa ra nga nagatapos niini. Daghang mga kaiglesiahan ang nagasugod, daghang grupo sa mga tawo. Usa lang ka Pundok ang makatapos. Kana mao ang magdadaug.

⁸⁷ Sa panahon ni Lot, oo, gikinahanglan sa maong babaye nga himoon kadtong usa ka madugay, hataas nga paglingi. “Oh, biyaan ko na *si Ingon niini-ug-ingon niana* didto, kadtong malipayon nga mga higayon namo didto. Dili gayud ako malimot niini.” Ug didto siya nasakpan, nasaraduhan didto sa gawas, sama kini sa nahitabo kaniadto sa mga adlaw ni Noe. Nasaraduhan siya didto sa gawas, nga wala gyud kaloy-i, ug namatay siya. Ug ang—ang porma niini nagatindog sa gihapon didto karon. Nanag-ingon sila (wala ako masayod) nga kung mabuakan mo kono kini og gamay ug motubo kini’g utro, usa ka haligi nga asin. Kung nakita na ninyo ang retrato sa *Sodoma ug Gomorra*, makita ninyo ang orihinal nga haliging asin nga nagtindog didto.

⁸⁸ Karon, adunay kalainan tali sa haliging asin ug sa Haliging Kalayo. Kita n’yo? Kinahanglan kang mopaingon sa usa ra ka direksyon. Oo.

⁸⁹ Himatikdi, sa panahon ni Juan nga Bautista. Sa panahon ni Juan nga Bautista, adunay nakaplagan nga unom ka nagmadaugon. Ang tanan nga kapanahonan, aduna ang mga niini og mga magdadaug. Sa panahon ni Juan aduna sila kaniadto og unom, nga mao si Jose ug si Maria, si Zacarias ug si Elisabet, si Simeon ug si Ann. Usa ka lalake ug usa ka babaye, usa ka lalake ug usa ka babaye, usa ka lalake ug usa ka babaye; kita n’yo, tipo ni Cristo, ang Iglesia; Si Cristo, ang Iglesia; Si Cristo, ang Iglesia; Si Cristo, ang Iglesia. Kita n’yo? Kita n’yo?

⁹⁰ Himatikdi, nagasugod kini gikan sa tawong natural. Dili, si Mo- . . . si Jose, ang tawong natural, si Jose, unsa man siya? Usa ka panday. Dayon ang saserdote, unsa man, siya? Usa ka ministro sa balay sa Ginoo; Si Zacarias. Ug gikan dinha, paingon kang Simeon, usa ka propeta ug usa ka babayeng propeta. Kita n’yo? . . .? . . . Pagpamatarung, pagkabalaan, bautismo sa Espiritu Santo. Amen. Wala ba ninyo kini makita? [Nagaingon ang kongregasyon, “Amen.”—Ed.] Sa hingpit. Unom ang nagmadaugon. Ang tanang uban pa kanila, naghimo og ilang mga halad ug tanan na, pero ang mga niini mao ang mga Pinili. Nagmadaugon sila.

⁹¹ Himatikdi ang matag kapanahonan sa iglesia. Ang mga mao ra pud ang mga nagmadaugon sa dihang sila, ang matag anak gikan sa matag kapanahonan sa iglesia, nagmadaugon sa tentasyon sa niana nga kapanahonan. Ania kanako ang Mga Kasulatan dinhi. Sa hunahuna ko wala na kita'y panahon pa aron mahimo kini, pero nasayran na nato ang matag usa sa mga kapanahonan sa iglesia. Mao sa gihapon karon. Sama kini sa usa ka tawo kinsa'y . . .

⁹² Kita n'yo, ingon sa giingon ko sa sinugdanan, gipanganak ka nga pildi na. Ug dili gyud mahimo sa nianang pagpanganak kanimo nga dad-on ka ngadto sa—sa Kinabuhi, tungod nga gipanganak ka nga pildi na. Ug ikaw anaa sa usa ka pildi na nga kalibutan, taliwala sa mga pildi na nga mga tawo, taliwala sa mga pildi na nga kredo, mga pildi na nga denominasyon. Kinahanglan nga moabot gyud ka ngadto sa kadaugan sa kung unsa man nga paagi.

⁹³ Sama lang kini sa usa ka lirio. Kon diin. . . Ang lirio, sa hunahuna ko, mao ang usa sa pinakamatahum nga mga bulak nga aduna kita. Mahiligon kaayo ko sa mga dagku nga calla lily ug pond lily. Sa hunahuna ko halos wala na'y mas matahum pa sama sa usa ka daku nga pond lily, nga ang tawag niini water lily. Kung daw sa unsa kini nagasidlak! Karon, diin ba kini nagagikan? Usa kini ka gamay'ng binhi, nga anaa sa ilalum sa lapukon, pitaon nga lim-aw. Ug kanang gamay'ng binhi, bisan nga wala pa, ang tanang sidlak nga mahimong isidlak niini, anaa na mismo sa sulod niini, niadtong didto pa kini sa lapuk. Apan kinahanglan niini nga maningkamot, sa adlaw-adlaw, nga nahibalo nga adunay usa ka butang. Maitum man. Mahugaw man. Pitaon man. Latablatab man. Sa nianang madanglog nga ginapuy-an niini, bisan pa niana nagapangita kini og paagi nga makalusot pagawas sa lapuk, sa pita, ug sa katubigan, ug gikan sa mga dapit nga bang-og, hangtud nga ang udlot niini mailusot ngadto sa ibabaw, ngadto sa sanag, ug ginapahayag kung unsa ang natago diha sa sulod niini sa dugay nga panahon.

⁹⁴ Sa hunahuna ko ingon niana ang nagamadaugon, nga, anaa kaniadto sa sala, nagahimo kaniadto og mga butang nga sayup, dili na kini kabalak-an karon. Kaniadto nagahimo'g mga butang nga sayup, kung ingon-ana, ngano man karon balikan og tanawon pa didto sa lim-aw? Kita n'yo? Tan-awa, ikaw adunay. . .

⁹⁵ Ang Dios, pinaagi sa Iyang predestinasyon, kita n'yo, gibuhi kini nga binhi, ug ginapalahus niini ang kaugalingon niini, kita n'yo, paingon sa kasanag. Ug karon, dugang pa niini, nagmadaugon kini. Kita n'yo? Wala niini ginapahayag ang kaugalingon niini *didto* sa ilalum. Mosaka kini, aron nga maipahayag ang kaugalingon niini.

Mao usab kamo, sa inyong—inyong sala, ug sa mga pagpanapaw, ug sa tanan na nga inyong gikinabuhi. Wala

ka og unsa man nga maipahayag. Apan adunay binhi dinha sa sulod, ug nagkaaduna kini og kahigayonan nga maitulod ang kaugalingon niini ngadto sa Kahayag. Ug karon anaa na ikaw sa Presensiya ni Jesus Cristo, kauban ang Kahayag sa Anak. Gipagawas niini kung unsa ka gayud sa sinugdanan. Nasabtan ba ninyo kung unsay akong buot ipasabot? Nakita mo ang Kahayag. Nanglimbukad ka. Giablihan mo ang imong kasingkasing, ug usa na ikaw karon ka lirio.

⁹⁶ Nahinumduman pa ba ninyo ang akong giwali bahin sa lirio? Si Reberendong Lirio, kung giunsa niya sa mga paghago. “Ug, bisan pa man, wala siya magkalinyas. Ug bisan pa, si Solomon, sa tibuk niyang himaya, wala makabisti sama sa usa niini kanila.” Siya—siya—siya—siya—siya . . . Tan-awa siya. Andam na siyang igaha- . . . Wala siya og unsa man nga gikuha para sa iyang kaugalingon. Wala nagabalaka sa bisan unsa ang lirio bahin sa iyang kaugalingon. Unsa man ang iyang ginahimo? Iyang—ginapagawas niya ang iyang katahum, ang iyang kinabuhi, aron makita sa uban. Naihayag ang iyang kinabuhi, aron makita sa uban ang himaya, kung unsa ang anaa sa sulod kaniya, nga atua kaniya sa didto pa siya sa lapuk. Karon anaa na siya sa ibabaw.

Ingon niana ang nagamadaugon. Nagmadaugon siya sa lapuk. Nagmadaugon siya sa mga butang nga iya sa kalibutan. Ug karon walay bayad nga iyang gihatag ang iyang kaugalingon. Ang tanan makahimo sa paglantaw kaniya. Ang iyang kinabuhi, wala ka’y ikasaway niini. Kita n’yo? Usa siya ka tinuod nga magdadaug. Wala ka’y unsa man nga ikasulti bahin sa iya karon. Ingon, “Gikan siya sa lapuk.” Pero wala na siya sa lapuk karon. Anaa na siya sa ibabaw niini. Amen. Dili mo na karon mamatudlo pa kung unsa siya kaniadto. Unsa na siya karon? Anaa na siya sa ibabaw.

⁹⁷ Dayon moagi ang putyokan ug moingon, “Talagsaon kaayo kana nga kahumot. Siguro adtoon ko ug kuhaon ang akong bahin.”

⁹⁸ Basta niya na lang ablihan ang iyang kasingkasing, “Umari ka. Sige.” Ang tanan nagakuha gikan kaniya. Kita n’yo? Siya, usa siya ka matuod nga pastor. Ginapahayag niya ang Himaya sa Dios. Ug tan-awa kon diin siya gikan. Gikinahanglan niyang nagmadaugon, aron mahimo kana.

⁹⁹ Usa ka higayon, ang lalake o babaye nga mga batan-on pa ug maanindot, matahum. Daghan kaayo sila og mga tentasyon nga kinahanglan pagaagihan, apan nagmadaugon sila niana. Kita n’yo? Nagmadaugon sila. Karon ginapahayag nila ang matuod nga katahum ni Cristo diha sa ilang kinabuhi. Himatikdi, nagapahayag, nga ning-agi sa lapuk.

¹⁰⁰ Gihatagan kita ni Jesus og panig-ingnan, kung unsaon sa pagbuhat niini. Karon gusto natong masayran kung unsaon pagpangdaug. Gisulti kanato ni Jesus kung unsaon sa pagbuhat

niini. Kita n'yo? Pagkamapainubsanon! Binaksan ang Iyang Kaugalingon, mikuha sa usa ka tualya, ug gihugasan ang mga tiil sa mga tinun-an ug gipangpahiran ang mga niini. Ang mismong Dios sa Langit gipakaubos ang Iyang Kaugalingon.

¹⁰¹ Dili nato gustong maulawan. Mao kana ang hinungdan kung nganong dili buot nga pataason sa mga kababayen-an ang ilang buhok ang hinungdan kung nganong ayaw nila magsinina nga sama sa nahiangay nga sinul-oban sa mga babayeng maugdang. Sama nga, ayaw usab sa mga kalalaken-an, kita n'yo, ingon niana usab kini nga butang. Ayaw nila. Sila, maulawan sila.

Apan, si Jesus, sa kanunay! Tan-awa Kinsa Siya. Kahalangdon! Aduna ko'y isulti. Ginapakaubos sa pagkahalangdon ang kaugalingon niini. Ginapakaubos sa *kahalangdon* ang iyang kaugalingon. Pagkahalangdon!

¹⁰² Nagkaaduna ako og pribilehiyo nga mahimong, mailhan ang pipila ka bantugan nga mga tawo. Ug ang kining mga tawo nga may pangpuli nga mga bisti, ug singkwenta sentimos lang ang sulod sa ilang bulsa, ug ipatagingting pa, mao kana ang tawong naghunahuna nga daw si kinsa na siya nga ang tinuod siro gyud siya. Apan mitindog na ako tupad sa bantugan nga mga tawo, buot kong ipasabot tawong mga bantugan gayud nga ang mga manggas nanglubad na, nga nangapilo. Sila pa ang magpahunahuna kanimo nga ikaw ang bantugan nga tawo. Kita n'yo?

Ang kahalangdon mao ang pagkamapainubsanon. Ayaw ninyo kalimti kana, Iglesia. Naipahayag ang kahalangdon diha sa pagkamapainubsanon, dili sa kung unsa ka kamaayo.

Dili ko buot ipasabot nga hugawan, ha. Ako—ang buot ko ipasabot mapainubsanon diha sa espiritu. Kita n'yo? Dili ko buot ipasabot nga basta—basta na lang nga mogawas ug. . . Wala man lang naligo ug nanghinlo. Kana, angay ninyong buhaton kana. Kabalo na mo niana. Kita n'yo?

Pero ang ginaingon ko mao ang bahin sa pagkamapainubsanon, tinuod nga pagkamapainubsanon, dili butang nga gapaaron-aron lang. Butang nga, nga matuod nga pagkamapainubsanon.

¹⁰³ Gisulti na ni Jesus kanato kung unsaon sa pagbuhat niini. Nagmadaugon Siya. Buot ipasabot. . . Ang *pagdaug* nagakahulogan og “masagubang ang pagsulay,” husto kana, sama sa gihimo sa tanang mga balaan kaniadto; sama sa gihimo ni Jesus: Sa taliwala sa tanan Niyang mga kaaway, nasagubang Niya ang pagsulay. Tanan nga butang nga naisulay batok Kaniya, nasagubang Niya kadto. Sa atubangan mismo sa balatian, ug Siya ingon nga Mesias, giayo Niya sila. Sa atubangan sa kamatayon, Iya kining gibuhi. Didto atubangan sa Kalbaryo, ang Kaugalingon Niyang kamatayon, gibuntog Niya kini pinaagi sa pagtugyan sa Iyang Kaugalingon. Ngano man?

Tungod sa Pulong. Miingon, “Gub-a ninyo kining templo, ug Akong patindugon kini sa ikatulo ka adlaw.” Ingon niana ang gisulti sa Pulong. Kita n’yo? Ug sa presensiya sa kamatayon, Iya kining gibuntog. Gidaug Niya ang kamatayon. Sa presensiya sa impiyerno, gibuntog Niya ang impiyerno ug nagmadaugon batok sa impiyerno. Oo. Sa presensiya sa lubnganan, gidaug Niya ang lubnganan. Ngano man? Ang tanan pinaagi sa Pulong, ug sa pagkamapainubsanon. Oh, sus! Mao kana ang Tawong tinuod. Kana ang Usa nga himoon ninyong ehemplo. Kita n’yo? Gibuntog Niya ang tanang butang, nagmadaugon niini.

¹⁰⁴ Tan-awa. Alang kadto Kaniya ang pagsulay. Nasayod ba kamo niana? Gisulti sa Biblia, “Gitintal Siya sa tanang paagi ingon kanato, hinoon wala makasala.” Gitintal Siya sa—sa pag-inom og makapahubog nga ilimnon. Gitintal Siya pinaagi og babaye. Gitintal Siya pinaagi sa tanang butang nga mahimong itintal Kaniya. Gitintal Siya sa tanang butang pareho sa mga gipangtintal kanato. Usa Siya ka Tawo, ug bisan pa niana wala kamo may maitudlo nga buling diha Kaniya. Oo, sir.

¹⁰⁵ Ang *pagdaug* nagakahulogan og, “ang maila ang yawa diha sa matag usa sa iyang mga limbong.” Daghang mga tawo ang nagaingon, “Wala ma’y yawa. Usa lamang kana ka hunahuna.” Ayaw ninyo toohi kana. Aduna gyu’y tinuod nga yawa. Ingon ka tinuod siya sama kanimong o kang kinsa man. Usa ka tinuod nga yawa, ug kinahanglan ninyo nga maila nga tinuod gayud siya. Kinahanglan ninyong mahibaw-an nga usa siya ka yawa. Dayon, sa mao usab nga higayon nga inyong—inyong maila siya, ug mahibaloan nga siya usa ka yawa ug batok siya kaninyo, kung ingon-ana, aron magmadaugon, kinahanglan nga inyong maila nga ang Dios nga anaa kaninyo mao ang mas labaw ug mas gamhanan kay kaniya, kanang maong Usa nga anaa kaninyo mao ang mibuntog na kaniya. Ug, tungod sa Iyang grasya, wala siya’y dag-anan kaninyo. Amen. Aduna gyu’y tinuod nga pagpangdaug, sa diha nga inyong maila.

¹⁰⁶ Molingi ka, moingon, “Ginabuhat ko ang *ingon-ani* ug ginabuhat ko ang *ingon-ana*,” nan, dili, kamo—kamo, nabuntog na mo.

“Apan walay pagkahinukman sa silot ngadto kanila nga anaa kang Cristo Jesus, nga nagakinabuhi dili uyon sa unod, kondili uyon sa Espiritu.” Nan maamgo ninyo nga nagmadaugon kamo.

Ug nahibalo kamo nga usa siya ka yawa. Dili ninyo mahimong isulti, “Aduna ko’y sakit, ug ako—ako—ako—dili ako motoo nga usa kini ka sakit.” Oh, sa tinuod, usa gyud kini ka sakit. May kanser ka, ikaw “dili motoo nga usa kini ka kanser.” Usa kini ka kanser. Usa gyud kini ka kanser.

Apan, hinumdumi, “Mas gamhanan Siya nga anaa kaninyo kay sa kaniya nga anaa sa iya sa kalibutan.” Kinahanglan

nga maamgo ninyo nga ang Espiritu Santo nga anaa kaninyo human nang gibuntog kini nga butang. Ug anaa Siya diha kaninyo, ug mahimo kamo nga magmadaugon pinaagi Kaniya. Tukmang makatarunganon gyud kana, sa eksaktong pagkasulat sa Kasulatan. Nagapangdaug!

Kinahanglan ko nang dalion. Naka-kwarentay-singko minutos na ako karon. Nakalapas na gyud ako sa oras karon.

¹⁰⁷ Himatikdi, pagdaug! Ang Dios nga anaa sa inyo mao ang mas gamhanan kay sa usa nga anaa kaniya. Ang dios nga iya sa kalibutan dili ingon ka gamhanan sama sa Dios sa Langit, nga anaa kaninyo, nga sama lang sa kangitngit nga dili makabarug diha sa presensiya sa kahayag.

¹⁰⁸ Karon, dili makabarug ang kangitngit diha sa presensiya sa kahayag. Dili ko igsapayan kung unsa pa kini kangitngit, pagahanawon kini sa kahayag. Dili kini makasagubang. Himaya! Apan dalhon mo ang ingon sa kabaga nga kangitngit nga gusto mo, ug sulayi pagbarug batok sa kahayag sa makausa, tan-awa kon unsay mahitabo.

Kana ang Maoy anaa kaninyo, ang Kahayag. Ug ang anaa sa kalibutan mao ang kangitngit. Busa, ginapamatud-an sa Kahayag nga ginadaug niini ang kangitngit, ug ang tawo nga anaa na kang Cristo ug siya nahibalo nga nabuntog na niya ang mga butang nga iya sa kalibutan. Amen. Wala na kini og unsa mang koneksyon kaninyo, man lang. Gawasnon na kamo. “Paglakaw diha sa Kahayag, maingon nga Siya anaa sa Kahayag, ug ang Dugo ni Jesus Cristo ang nagahinlo kanato gikan sa tanang sala, ug may pakig-ambitay kita sa usa’g usa.” Tan-awa ninyo.

¹⁰⁹ “Siya nga anaa kaninyo labaw pa kay kaniya nga ania sa kalibutan.” Karon, kon nagalingi pa kamo ug kamo ginasaway, kung ingon-ana gapabilin pa kamo sa gihapon sa kalibutan. Apan kon nagkinabuhi kamo ibabaw niana, kung ingon-ana Siya nga anaa kaninyo mao ang miagak kaninyo ibabaw sa kangitngit.

Sama sa lirio, anaa siya sa ibabaw sa kangitngit sa lapuk. Anaa siya sa ibabaw sa maong kangitngit sa lapukon nga katubigan. Anaa na siya sa kahayag, nga ginareplektar ang katahum nga anaa na kaniya sa wala pa niya biyai ang lapuk. Amen.

¹¹⁰ Karon ako—mabati ko nga daw sa kasinggiton ako nga Cristohanon. Kung unsa ang anaa na sa sulod dinha tungod sa Dios, sa sinugdanan, naninguha kini nga makalahus, nga magmadaugon. Gidaug niini ang kabhang. Gidaug niini ang lapuk. Gidaug niini ang katubigan. Gidaug niini ang tanantanan, ug usa ka nagmadaugon, ug gireplektar ang katahum ug Himaya sa Dios.

¹¹¹ Ingon niana ang ginahimo sa matag magtotoo. Ingon niana ang gihimo ni Noe. Ingon niana ang gihimo ni Lot. Ingon niana. Tan-awa kung unsa ka mahugaw ang kinahanglan niyang maagian. Ingon niana ang gihimo ni Moises. Ingon niana ang gihimo ni Josue. Ingon niana ang gihimo ni Daniel. Ingon niana ang gihimo ni Sadrach, Mesach. Ingon niana ang gihimo nila Juan Bautista; Zacarias, Elisabet. Ingon niana kaniadto si Simeon, ingon niana kaniadto si Anna, nga gihimo sa matag usa kanila. Gipangdaug nila ang lapuk nga nakapalibot kanila ug nga nakaputos kanila. Gipalahu gyud nila ang ilang ulo pagawas niadtong maong butang, ug gipasidlak ang Himaya sa Dios. Ingon niana ang ginahimo sa usa ka tinuod nga Cristohanon.

¹¹² Hinumdumi, gipakita ni Jesus Kaniya kon sa unsang paagi kadto gihimo. Kwarenta ka adlaw nga pagtintal, gitintal Siya nga labaw pa kay sa kinsa mang tawo nga mahimong tintalon, kadtong pagtintal kang Jesus Cristo. Bantayi. Gipakita Niya kanato kung giunsa kadto paghimo.

Karon tapuson na nako, sa pipila ka minutos.

¹¹³ Tan-awa. Gipakita Niya kanato kung giunsa kadto paghimo. Giunsa ba Niya kadto paghimo? Pinaagi sa Pulong. Sa ingon niana nga paagi Niya kadto gihimo, tungod kay Siya mao ang Pulong. Ug gisulti ni Jesus, “Kung kamo magapabilin Kanako, ug ang Akong mga Pulong magapabilin kaninyo,” nagabalik na usab kamo sa Pulong, ang Pulong sa saad. Unsa ang Pulong sa saad ngadto sa matag Cristohanon? “Siya nga anaa kaninyo labaw pa kay kaniya nga ania sa kalibutan.” Kung ingon-ana unsaon ko sa pagdaug? Dili ako, kondili ang Pulong nga ania kanako. Dios ang Pulong. Kung ingon-ana nagmadaugon ako sa mga butang sa kalibutan, tungod kay ang Pulong kini nga ania kanako. “Kung kamo magapabilin Kanako, ang Akong mga Pulong magapabilin kaninyo, pangayo kamo sa bisan unsang butang nga buot ninyo.” Magpadayon lang sa pagduso pasaka. Paingon ka na sa ibabaw, sa ingon ka sigurado sama sa unsa man nga butang. Kita n’yo? Kinahanglan nga makaabot ka ngadto sa ibabaw.

¹¹⁴ Sa kuwarenta ka adlaw nga pagtintal Kaniya, nagmadaugon Siya tungod sa Pulong sa Dios. Aduna ko’y gustong ipahayag dinhi sa pipila ka minutos. Naghimo si Satanas og tulo ka dagkung mga pag-atake Kaniya diha sa maong pagtintal. Bantayi. Anaa gyud kini kanunay sa tulo. Ayaw kini kalimti. Kita n’yo? Naghimo siya og tulo ka dagkung mga pag-atake, gikan sa labing taas ngadto sa labing ubos. Gipaningkamotan niya ang tanan nga mahimo niya aron buntogon Siya. Apan Siya mao ang Pulong. Amen. Unsa man ang Iyang gigamit? Ang Kaugalingon Niya, ang Pulong. Tulo ka dagkung mga pag-atake ni Satanas o mga pagpanghasmag batok Kaniya, pero gibatokan Niya kini pinaagi sa Pulong. Ang matag pag-atake, madaug Niya

kadto pinaagi sa Pulong. Bantayi kini karon, gikan sa labing taas ngadto sa labing ubos.

¹¹⁵ Ang una niyang gihimo nga pag-atake, maoy aron gamiton ni Jesus ang Iyang dakung gahum. Nga, nasayod Siya nga Siya mao ang Pulong. Nasayod Siya sa Iyang posisyon. Nagatoo ba kamo nga nahibalo Siya niadto sa Iyang posisyon? [Nagaingon ang kongregasyon, “Amen.”—Ed.] “Ako nga Anak sa Tawo.” Nasayod Siya sa Iyang posisyon. Ug miduol si Satanas ug gustong ipagamit Kaniya ang Kaugaliningon Niyang gahum ngadto Kaniya Mismo, aron pakaonon Siya, kung gusto Niyang pakaonon ang Iyang Kaugaliningon. Gigutom Siya niadto. Pag gutom ang tawo, mahimo niya halos ang bisan unsa na lang nga butang. Mangawat siya, manulis, magpakilimos, mangutang, bisan unsa nalang. Kita n’yo? Aduna siya niana nga kagana. Ug gigamit ni Satanas ang iyang unang pinaka-dakung pag-atake ngadto Kaniya, aron ipagamit Kaniya ang Iyang gahum nga gikahatag Kaniya aron sa pagpangdaug ug gamiton kini para sa Iyang Kaugaliningon. Wala Niya kadto gigamit para sa Iyang Kaugaliningon. Wala. Gigamit Niya kadto para sa uban. Husto kana. Gigamit Niya kadto para sa uban, dili para sa Iyang Kaugaliningon. Dili kini para Kaniya. Bisan tuod, mahimo man Niya kadto. Sigurado gyud nga mahimo man Niya kadto.

¹¹⁶ Apan tan-awa kung ginaunsa sa yawa? Gusto sa yawa nga hatagan mo siya og pagtagad. Gihatagan lang Niya kaniadto og pagtagad kung unsa ang gisulti sa Amahan nga himoon. Husto kana.

Miingon Siya, “Aba,” miingon si Satanas, “nahisulat, ‘nga pagamandoan Niya ang mga Anghel . . .’”

¹¹⁷ Miingon Siya, “Oo, apan nahisulat usab kini . . .” Kita n’yo? Tan-awa ninyo. Kita n’yo? Nasayod Siya kung Kinsa Siya. Ang gihimo ni Satanas . . .

Ang Hunahuna mas lalum pa kay sa pagka-sulat Niini. Kita n’yo? Inspirasyon Kini. Anaa sa sulod Niini ang lugas, nakita n’yo, kung unsa gyud Kini.

¹¹⁸ Bisan tuod mahimo Niya kadto, wala Niya kadto himoa. Kondili Iyang—wala Niya hatagi og pagtagad ang tanyag ni Satanas.

Karon, ania ang usa ka maayong butang. Kita n’yo? Usahay madala ka ni Satanas, ug sa tan-aw mo nga ginabuhay mo ang kabubut-on sa Dios, ug tanyagan ka niya, nga madani ka niini. Oo, sir. Sigurado gyud nga mahimo niya.

¹¹⁹ Karon kuhaon lang natong, pananglitan, sama sa atong mga igsoong babaye. Mga maanyag sila. Ug mahimo niya kamo dad-on sa usa ka punto, nga, pataason ninyo ang inyong buhok, nga dili ninyo mabantayan. Maanindot kaayo kini tan-awon sa inyo, ug, mahibaloan mo na lang, mibati ka na og gamay’ng garbo, nga medyo mas labaw ka na kay sa uban. Ang pipila sa inyong

mga kalalaken-an, nasayod mo unsa ang akong buot ipasabot. Kita n'yo? Ug mahimo niyang gamiton ang mao rang butang ug itanyag kini kanimo. Husto kana. Kinahanglan nga madaug mo kana.

Hinumduman lang, nagakinabuhi ka para sa Dios. Aduna ka'y usa ka tumong, ug kana mao si Jesus Cristo. Gawas niana, wala na'y uban pa nga mas mahinungdanon. Mao kana Siya. Dayon, Ikaduha, para sa imong pamilya. Dayon, ikatulo, para sa imong kaugalingon. Apan, una, para gyud sa Dios; sunod, para sa imong pamilya; ug sunod, para kanimo. Ikatulo ka; mao kana ang pinakaulahi. Ipaulahi ang imong kaugalingon; Ingon niana ang gihimo Niya.

¹²⁰ Tan-awa kung unsa unta ang mahimo Niyang buhaton kaniadto. Miingon, "Mahimo Kong tawagon ang Akong Amahan, makigsulti Kaniya, dihadiha dayon Iyang ipadala Kanako ang napulo ug duha ka mga legion sa iyang mga manulonda." Kon diin, usa Kanila makahimo na sa paggun-ob sa kalibutan. Miingon, "Kung ang Akong Ginghamian niini pa nga kalibutan, nan ang Akong mga ulipon nakig-away na unta. Apan ang Akong Ginghamian atua man sa Itaas." Tan-awa ninyo. Kita n'yo? Mahimo Niya untang buhaton kadto, pero wala Niya buhata. Kita n'yo? Bisan pa man, nga mahimo Niya untang buhaton kadto. Wala Niya gihatagan og pagtagad ang tanyag ni Satanas.

¹²¹ Karon, nadungog na ba ninyo ang mga tawo nga nagaingon, "Kung—kung nagatoo ka nga adunay—adunay usa ka Balaang mananambal. . . Kung usa ikaw ka Balaang mananambal. . . Adtoi'g kuhaa ang imong Balaang mananambal. Aduna ko'y usa ka tawo dinhi, nga nagmasakiton. Gusto ko nga makakita kaniya nga nagaayo ngadto niini." Nakita n'yo na ang mao ra nga yawa? [Nagaingon ang kongregasyon, "Amen."—Ed.] Naninguha siyang tanyag kamo. Naningkamot siya nga maminaw ka ngadto kaniya inay sa Dios. Apan ang usa ka tinuod, matuod nga alagad sa Dios mamati ug hibaloong kung unsa ang ginasulti sa Amahan, usâ. Kita n'yo?

¹²² Sama sa gamay'ng bata nga si Stadskev, sa diha nga nagpadala sila dinhi. Ug miingon si Mrs. Stadskev, "Igsoong Branham, nanawag ako gikan sa Germany." Adunay kasundalohan sa Amerika, nga nagtugpa ang usa sa ilang mga eroplano didto sa tugpahanan, nga ipasakay ako paadto sa Germany ug pabalik, sulod lang sa usa ka adlaw. Usa siya ka chaplain. Ug ang bata naghigda didto, nga patay na. Ug nagasiyagit kadtong gamayong inahan, miingon siya, "Pamati kamo!" Ingon pa, "Nasayod ako. Nagtindog ako mismo didto ug nakita kadtong babaye nga nagkugos niadtong patay na nga bata diha sa iyang mga bukton, nga namatay nianang buntaga. Nakita ko si Igsoong Branham nga milakaw paduol didto, gipandong ang iyang mga kamot ngadto sa patay na

nga bata, ug nabuhi kini.” Miingon, “Anak ko kini, Igsoong Branham.” Wala pa kaniadto namatyan ang ilang pamilya. Kita n’yo? Ug kining gamay’ng bata nagmasakiton niadtong usa ka buntag ug namatay nianang hapon.

Ania silang tanan nga nagatindog sa palibot, ug nanagpanagna ug ingon-anang mga butang, “Mabuhi ang bata,” ug tanan na nga sama niana.

¹²³ Ingon ko, “Bueno, maayo gyud kana, Igsoon nga babayeng Stadskev. Pero tan-awon ko usâ kung unsa ang ginaingon sa Amahan.”

Miadto ako sa kakahoyan. Ug nag-ampo ako. Misulod ako og balik; nanawag siya sa makaduha o makatulo ka higayon sa wala pa ako nakabalik sa sunod nga buntag. Wala gyud.

Miingon ang Doktor, “Sige.” Miingon, “Kung ingon niana man, kung aduna ka’y pagtoo nga sama niana, gining, dili namo pagawason ang bata sa ospital. Pasagdan lang namo kini nga nakapahiluna mismo dinhi. Pabilin ka lang dinhi kauban niini. Ok lang.”

Miadto si Igsoong Stadskev ug nakigkita sa medyor sa kasundalohan. Miingon sila, “Sige. Ilupad namo siya didto ug dalhon siya balik.”

¹²⁴ Ug naandam na didto ang eroplano, nagpaabot, aron dad-on ako didto niadtong buntaga ug dad-on ako pabalik nianang gabii, sa Germany, sa Heidelberg, Germany para mabanhaw kini nga bata. Miingon ako, “Sigurado, nga mahimo gyud kana sa Dios, apan hibaloon usâ nato kung unsa ang Iyang kabubut-on.”

¹²⁵ Dayon migawas ako, nag-ampo sa tibuok gabii. Walay nahitabo. Mibalik pagkasunod buntag; walay nahitabo. Ug sa pasulod na ako sa kwarto. Dayon sa pagtan-aw ko didto, ug atua didto ang Kahayag nga naglutaw didto sa pultahan. Miingon, “Ayaw hilabti kana. Ayaw paghinginli kana. Kana mao ang kamot sa Dios.”

¹²⁶ Gitawgan ko siya sa telepono. Ingon ko, “Igsoon nga babayeng Stadskev, ilubong mo na ang imong anak. Kini mao ang kamot sa Ginoo. Kabubut-on kini sa Dios. Aduna pa’y mahitabo nianang bata pagmodugay pa. Pasagdan mo na lang kini nga mopaingon kon diin nahibaloan sa Dios kung asa na kini. Puede mo na kini karon adtoan. Buhi siya, ayaw na og kabalaka. Pasagdan mo na kini nga ingon niana.”

¹²⁷ Kadtong ilado nga magwawali nga Lutheran sa Germany nagpadala og nagsulat ug miingon, “Ginadayeg ko gayud, kung unsa, nga si Igsoong Branham nagpaabot gayud alang niadtong tin-aw nga desisyon sa Dios, sa wala pa siya nagsulti og unsa man.”

Ingon niana kini. Panggunit gayud ngadto sa desisyon sa Dios. Bisan unsa pa ang ginasulti sa uban, o bisan unsa man kini, ayaw pagpakigtanyag kang Satanas, ayaw gayud.

¹²⁸ Kung moingon si Satanas, “Karon, ang bautismo sa tubig, sa ngalan sa ‘Amahan, Anak...’” Kung ingon niana, bisan magtanyag siya, biyaan mo kini. Sukwahi ang ginasulti sa Dios. Kung moingon siya, “Buotan gyud ka nga tawo, dili mo na kinahanglan nga... Buotan gyud ka nga babaye, dili mo na kinahanglan nga...” Ayaw gayud og patanyag. Kung lahi ang ginasulti sa Pulong, magpabilin ka sa Pulong bisan unsa pa kini. Mao kana ang ehemplo nga ginahatag ni Jesus kaninyo, ug mao kadto ang nag-unang pag-atake, kita n’yo, nga gihimo niya ngadto Kaniya.

¹²⁹ Dayon, ang ikaduhang pag-atake. Dalion ko na. Medyo agpas kaayo modagan ang oras. Ang sunod nga dakung pag-atake, nga gihimo niya ngadto Kaniya, maoy aron himoon Siyang mapangandakon.

Ug ang paagi niana maoy dauton ang mga alagad sa Dios, aron himoon siyang mapangandakon, ipangandak kung unsa ang arang mong mahimo. “Himaya sa Dios! Allelujah! Usa ako ka tigluwas! Ingon niana ako.” Kita n’yo? Kita n’yo?

¹³⁰ “Saka Ka ngari, sa ibabaw sa templo, ug lingkod dinhi.” Gitintal niya Siya nga himoon kadto. Karon, hinumdumi, grabe ang pagtintal Kaniya aron himoon, kadto. Miingon, “Karon, kung gusto Mo nga mahimong inila sa atubangan sa mga tawo, tumindog Ka dinhi niining templo, og umambak Ka.” Kita n’yo? “Hatagan ta Ka og Kasulatan para niini, tungod kay nahisulat na, ‘Magahatag Siya og sugo sa mga Manulonda mahitungod Kanimong, kay tingali, unya, mahipangdol ang Imong usa ka tiil sa bato. Pagasapnayon Ka Niya.’” Aron himoon Siyang mapangandakon, aron nga ipasundayag ang Iyang gahum.

¹³¹ Wala gayu’y tinuod nga alagad sa Dios ang mobuhat niana. Pagmay makita kang tawo nga nagapangandak, pinalabaw ang dughan, ug tanan na nga sama niana, hinumdumi lang, adunay sa kung unsang sayup niana. Dili. Ayaw sa Dios ang ingon niana. Nagpakita na si Jesus og ehemplo. Mahimo man Niya kadto. Siguradong mahimo man Niya kadto, apan wala Niya kadto himoa. Walay alagad sa Dios nga mapangandakon, sa iyang kaugalingon, nga angkonon ang gahum sa Dios ug ipakita ang iyang kaugalingon nga mas labaw pa kay sa uban.

¹³² Nahinumdoman ba ninyo nga gibuhat kana kaniadto ni Moises? Nahinumdoman ba ninyo kini? [Nagaingon ang kongregasyon, “Amen.”—Ed.] Gihatagan siya sa Dios og gahum sa pagbuhat sa unsa man nga gusto niya; gihimo siya nga usa ka propeta. Milakaw siya paduol niadtong Bato, ug gibunalan niya ang maong Bato sa makaduhang higayon. Supak kadto sa kabubut-on sa Dios.

Miingon ang Dios, “Magsulti ka ngadto sa Bato. Ayaw kini bunali pag-usab. Pagalapason mo ang tanan nga—tanan nga—nga tipo dinhi. Usa lamang ka higayon pagabunalan ang Bato.” Apan gipakahulogan niya kaniadto nga may kahuyang ang Pulong sa diha nga gibuhat niya kadto; nga dili Kadto igo. Oo. Ang Pulong mao ang atong ginahisgotan. Kadtong Bato mao ang Pulong. Kita n’yo?

¹³³ Siya, sa unang higayon, gibunalan niya ang Bato ug miagay ang mga tubig. Ug pagkahuman giuhaw sila pag-usab. Miingon Siya, “Karon mobalik ka ug magsulti ka ngadto sa Bato.” Pagabunalan lamang kadto sa usa ka higayon. Kita n’yo?

“Ang pagkadili-igo sa Pulong,” mao kadto ang gipakahulogan ni Moises. “Nga dili-igo ang Pulong; gikinahanglan pa niyang bunalan pag-usab.”

¹³⁴ Busa miadto didto si Moises ug gibunalan ang maong Bato nga sama niana, miingon, “Magpaagay ka!” Walay miagay, busa gibunalan niya kadto pag-usab, ug miingon, “Magpaagay ka! Ginasugo ta ka nga magpaagay ka.” Ug miagay ang mga tubig.

¹³⁵ Miingon ang Dios, “Saka ka ngari. Umari ka. Gihimaya mo ang imong kaugalingon. Giangkon mo ang Akong gahum; imbes nga ipakita nga balaan Ako, gipakabalaan mo ang imong kaugalingon. Karon dili ka na makaadto sa maong yuta. Lantawa didto, tan-awa kung unsa ang hitsura niini; apan, dinhi, mopanaw ka na mismo dinhi.” Oh, sus! Wala na nagkaaduna pa og usa nga sama kang Moises, kabalo na mo. Wala, wala na.

¹³⁶ Sa dihang naki-indigay si Satanas didto kang Jesus, miingon siya, “Motungtong Ka sa templo dinhi ug umambak Ka.”

¹³⁷ Giingnan Niya, “Nahisulat na,” amen, “Ayaw pagtintala ang Ginoo nga imong Dios.” Kita n’yo? Giharong Niya siya pinaagi sa Pulong, sa niana, ug sa matag dagkung pag-atake.

¹³⁸ Walay tinuod nga alagad nga nagapaninguhang ipangandak ang iyang kaugalingon, nga gamit—gamit ang gahum sa Dios. Sa diha nga buhaton niya, pildi siya dihadiha dayon.

¹³⁹ Ang ikatulo nga dakung pag-atake, mitanyag si Satanas nga ihatag ang kining gingharian ngadto Kaniya. Gitanyag niya. Miingon si Satanas, “Nakita Mo ba kining mga gingharian sa kalibutan? Akô ang mga niini. Ginahimo ko sa mga niini ang unsa mang magustohan ko. Igahatag ko kini Kanimo.”

Apan, timan-i n’yo, naningkamot siyang ipakuha kini Kaniya nga dili pinaagi sa krus. Kung gihimo Niya, nangalaglag na unta kita. Mahimo man Niya nga kuhaon na ang gingharian. Apan kinahanglan Niya nga tumanon ang . . . Kinahanglan Siya nga mobalik. Gitintal Siya nga himoon kadto, ha. Malisud nga butang ang kamatayon. Gitintal Siya nga gamiton ang Iyang kagawasnon ug nga mahimong Hari sa yuta, nga dili pinaagi sa

krus. Pero, kung gihimo Niya, nangamatay na unta ang Iyang mga sakop. Malipayon kaayo unta si Satanas nga himoon kadto nga pagpakigsabot uban Kaniya. Apan miingon Siya, “Pahawa ka sa Akong atubangan, Satanas.” Wala Niya himoa kadto.

¹⁴⁰ Mianhi Siya ug nag-antus, ug gipili ang malisud, gansangon nga dalan. Gipili Niya ang dalan nga iya sa mga ginalutos. Gipili Niya ang dalan sa kamatayon.

Kita ba, niining buntaga, andam nga mohimo, pilion ang mao ra nga dalan nga Iyang giagian? Andam ba kita nga mamatay? Andam ba kitang itugyan ang atong mga kaugalingon ngadto sa Dios, isurender ang tanan sa kalibutan ug ingon-anang mga butang, aron mangalagad para Kaniya? Kita n’yo?

¹⁴¹ Karon, wala Niya gihimo kadto. Gusto nga—nga isurender unta kadto, ni Satanas, ngadto Kaniya. Apan wala Niya kadto dawata. Bisan pa man nga gitintal si Jesus, nagmadaugon Siya alang kanato. Iyang—Iyang gisagubang ang tanan nga mga pagtintal para kanako ug para kanimo. Kita n’yo? Mahimo man Niya unta nga dawaton mismo kadto. Apan para sa unsa man nga gipili Niya ang lain nga dalan? Aron nga makaduol kita, makauban Siya. Ug kung mibayad Siya sa ingon ka daku nga bili nga sama niana, kung ingon niana unsa ka gamay lamang kita nga dili kini dawaton? Sa dihang, timan-i, wala na man ka’y makuha dinhi bisan unsa, man lang.

¹⁴² Kung mabuhi man ka og usa ka gatus ka tuig, unsa ma’y imong padulngan? Nga ang pangutok, ug ang imong hustong panghunahuna wala na, baldado na, ug tiguwang na ug gakurogkurog pa. Kana mao ang imong padulngan, ug kana mao na ang katapusan niining tanan. Dumuol ka karon, dauga kini nga butang. Unsaon mo paghimo niini? Pinaagi sa Pulong. Kung unsa man ang ginasulti sa Pulong, buhaton mo kini. Maglakaw nga mapainubsanon. Magkinabuhi sa atubangan ni Jesus.

¹⁴³ Iyang gisagubang ang tanang butang alang kanimo ug kanako. Siya mao ang atong ehemplo kung unsaon sa pagdaug ang atong dautan nga henerasyon, maingon sa pagdaug Niya sa Iyang dautan nga henerasyon.

¹⁴⁴ Hinumdumi, sa dihang mianhi Siya sa yuta, aduna na ang ingon ka daku nga kawalay-pagtoo, o labaw pa, kay sa aduna sa unsa mang kapanahunan. Wala kadto nakapabalaka Kaniya ni gamay. Sa diha nga gitawag nila Siya nga usa ka yawa imbes nga Dios, sa dihang gitawag nila Siya sa tanan na nga mahimo nilang itawag, wala kadto nakapabalaka Kaniya ni bisan gamay. Aduna Siya og usa ka tumong: “Sundon ang Amahan. Tumanon ang Pulong.” Dios ang Pulong. Aduna Siya og usa ra ka tumong.

¹⁴⁵ Usahay matintal kita sa pagbalik. Daghan kaninyo, ang matintal nga mamalik ngadto sa denominasyon, mamalik ug sugdan na usab, tungod ang tibuok kalibutan nagaingon, “Sa unsa ka ba nga denominasyon nahisakop? Sa unsa ka ba nga

iglesiya miyembro?” Matintal kita nga buhaton kana; tanan kita. Matintal nga mamalik ang atong mga kaigsoonang babaye, mamalik ug magpamiyembro sa uban pa niining mga iglesya, pila sa niining mga Assemblies, o mga church of God, o pipila sa mga niini; magpabilin sa gihapon nga Pentecostal, nga ginapaputlan ang inyong buhok, ug mangsul-ob sa bisan unsa na lang nga gusto ninyong sul-obon. Kita n’yo? Nagakatintal kamo nga buhaton kana, mamalik ug mamahimong inila uban sa niining dautan nga henerasyon nga atong gikapuy-an.

Sa dihang, kini ang pinakadakung kasal-anan sa atong panahon. Kini ang pinakadakung kasal-anan sa taliwala sa atong mga katawhan, ang pagka-kalibutanon, sama sa gisulti diha sa Biblia nga ang Laodi- . . . ingon niana ang Kapanahonan sa Laodicea. Kalibutanon kini, “Dato, wala na nagkinahanglan og bisan unsa; wala makaila nga siya diay hubo, makalolooy, talamayon, ug buta.” Mao kana ang kasal-anan sa atong panahon. Sa dihang madungog mo ang Pulong sa Dios nga nagasinggit batok niini, tungod niini mas pilion mo ang ubang dalan, dili na man ka mahimong kahimut-an sa kalibutan. Natintal ka nga mobalik.

¹⁴⁶ Kabalo ko. Padayon kamong nagasulti kanako. Kabalo ko nga ginasulti ninyo, “Pirmi na lang.” Kabalo ko nga gikapuyan na kamo sa sige kong pagbalik-balik sa niining mga butang. Gikapuyan man pud ko nga makita kamong ginabuhat kini, usab, husto kana, kining sala nga sige kong ginasulti kaninyo. Moingon, “Para ba gyud sa unsa nga ginabalik-balik mo kini?” Undangon na ninyo ang pagbuhat niini, kung ingon-ana. Ginapaninguhaan ko nga maluwas ang inyong kinabuhi, pinaagi sa Pulong. Gikapuyan na ako, usab. Busa, magmatarung na lang. Usa kini ka kasal-anan, nga dili angay buhaton. Oo, sir.

¹⁴⁷ Kinahanglan nato nga madaug kining mga butanga. Lauman nato nga pagatintalon gyud kita sa mga niini, sa kalibutan. “Pag-higugmaon ninyo ang kalibutan, ang mga butang nga iya sa kalibutan, ang gugma sa Dios wala kaninyo,” ang giingon ni Jesus.

¹⁴⁸ Karon tapuson na lang nato, ug isulti kini. Adunay ganti alang sa nagmadaugon.

¹⁴⁹ Tugoti nga basahon ko ang usa ka butang dinhi kaninyo. Ablihi ang inyong mga Biblia. Balikan nato ang Pinadayag, ang ika-3, ang ika-2 nga kapitulo. Bantayi dinhi karon, ang tanan sa niining mga butang nga akong ginahisgotan, aron sa pagdaug. Karon tan-awa lamang ang inyong kaugalingon ug hibaloa. Susiha ang inyong mga kaugalingon diha sa espirituhanon nga samin, tan-awa kung nagmadaugon ba kamo.

¹⁵⁰ Karon, ang unang mensahe, ngadto sa—ngadto sa manolunda sa Efeso, gusto ko nga maminaw kamo sa kung unsay Iyang gisulti. Ug sa Pinadayag, sa ika-2 nga kapitulo, ang ika-7 nga

bersekulo. Para kini nianang kapanahonan sa iglesia, sa dihang gisulti Niya kanila ang tanan nga ilang gipangbuhat, “Gibiyaan ang ilang nahaunang gugma.” Ang ika-7 nga bersekulo:

Ang aduna’y igdulongog, kinahanglan magpatalinghug sa ginaingon sa Espiritu ngadto sa mga iglesia; Ang magamadaugon (ang tawo, dili ang iglesia) . . . Ang magamadaugon—magamadaugon Akong pagatugotan sa pagkaon sa bunga sa kahoy sa kinabuhi, nga anaa sa taliwala sa paraiso sa Dios.

Kita n’yo? Ang mga magdadaug sa Efeso.

¹⁵¹ Karon, ang sunod mao ang Esmirna. Karon, sa mga magdadaug niana, paminawon nato kini. Karon, ang ika-11 nga bersekulo.

Ang aduna’y—aduna’y igdulongog, kinahanglan magpatalinghug siya sa ginaingon sa Espiritu ngadto sa mga iglesia; Kaniya nga magamadaugon walay gahum sa pagdaut kaniya ang ikaduhang kamatayon.

Kita n’yo? Nagmadaugon sila niini.

¹⁵² Karon, kana, tan-awa karon sa Pergamo, makita nato kung unsa ang gibilin alang kaniya nga nagmadaugon, diha niini. Basahon nato ang ika-17 nga bersekulo, alang sa iglesia sa Pergamo.

Ang aduna’y igdulongog, . . .

Kana, kana ang indibiduwal, dili ang tibuok nga pundok. Ang indibiduwal, kana mao ang Pangasaw-onon nga migawas, nakita n’yo, ang Iglesia.

Siya nga may igdulongog, magpatalinghug sa ginaingon sa Espiritu ngadto sa mga iglesia; Ang magamadaugon Akong pagahatagan sa pagkaon sa manna nga tinagoan, ug pagahatagan Ko siya’g usa ka gamay’ng bato nga puti, ug sa bato may gisulat nga usa ka bag-ong ngalan, nga dili masabut ni bisan kinsa gawas kaniya nga mao’y nagadawat niini.

Mao kana ang para sa nagamadaugon, sa maong kapanahonan sa iglesia.

¹⁵³ Karon, ang sunod mao ang Tiatira. Hibaloon nato kung unsa ang aduna sa nagamadaugon diha nianang panahona. Kuhaon nato ang ika-26 nga kapitulo.

Ug kaniya nga magamadaugon, ug ang magatipig sa akong mga buhat hangtud sa katapusan, kaniya igahatag Ko ang pagbulot-an ibabaw sa mga nasud: (Husto kana.)

Ug . . . siya magahari kanila uban sa baras nga puthaw; ug ingon nga ang mga panudlanan sa mga magkokolon

nga pagadugmokon: sumala usab sa Akong ginadawat gikan sa akong Amahan.

Kita n'yo, "Uban Niya, sa Iyang trono." Magahari si Cristo sa mga nasud, uban sa baras nga puthaw. Ug ania ang Iglesia nga nagmadaugon, "Nagalingkod didto, kauban Niya, aron pagadugmokon ang mga nasud gamit ang baras nga puthaw."

¹⁵⁴ Dad-on nato sila karon ngadto sa iglesia sa Sardis. Karon ang ika-5 nga bersekulo sa ika-3 nga kapitulo.

Kaniya nga magamadaugon, sa mao ra pagasul-oban og mga bisti nga maputi; ug ang iyang ngalan dili ko pagapapason gikan sa libro sa kinabuhi, hinonoa igasugid ko ang iyang ngalan sa atubangan sa akong Amahan, ug sa balaan nga mga manolunda.

Mao kana ang para sa nagamadaugon sa Sardis.

¹⁵⁵ Karon, kuhaon nato karon ang ika-12 nga kapitulo. Karon, alang kini sa iglesia sa—sa Filadelfia, sa ika-12 nga kapitulo.

Siya nga magamadaugon akong pagahimuon nga haligi diha sa templo sa akong Dios, ug dili na siya magagula niini: ug igasulat ko diha kaniya ang akong ngalan, ang ngalan sa akong Dios, ug ang ngalan sa siyudad sa akong Dios, ang bag-ong Jerusalem, nga manaug gikan sa langit. . .Dios: ug igasulat ko diha kaniya ang akong bag-o nga ngalan.

¹⁵⁶ Bantayi kung unsa ang gisaad ngadto sa nagamadaugon. Kita n'yo?

Karon, karon ang Laodicea, mao kana ang katapusang kapanahonan sa iglesia. Magkaaduna og pipila ka magdadaug dinha. Bantayi dinhi. Sila, hinumdumi, ang matag kapanahonan sa iglesia, ang matag nagsunod niini magapanunod sa tanan nga gikasaad ngadto sa nag-una ug sa uban pa nga gisundan niini. Bantayi dinhi. Karon, ania na, human nga ilang nadawat ang tanan niining mga gahum, kining bag-ong mga ngalan, ug tanan na nga nahisulat, nga gisaad Niya, ug mikaon sa tinago nga manna, ug ang tanan-tanan niini. Bantayi kining katapusang kapanahonan sa iglesia, Pinadayag 3:21.

Ang magamadaugon pagatugotan ko sa paglingkod sa akong trono uban kanako, (amen), maingon nga ako usab nagmadaugon, ug milingkod uban sa akong Amahan diha sa iyang trono.

Ang aduna'y igdulongog, kinahanglan magpatalinghug sa ginaingon sa Espiritu ngadto sa mga iglesia.

¹⁵⁷ Aduna kanang ganti alang sa mga magdadaug. Magpadayon ka, lirio. Kung kini anaa kaninyo, ipadaplin ang lapuk ug ang tanang uban pa, ug magpadayon pasaka ngadto sa ibabaw. Oo, sir. "Aron molingkod uban Kanako sa Akong trono."

¹⁵⁸ Kabalo mo, usa ka higayon, ang inahan nila Santiago ug Juan. . . Wala na kita'y igong oras aron basahon pa kini. Miabot ang inahan nila Santiago ug Juan ug gipangayo ang kini nga puwesto. Kabalo ba mo niana? Nahinumduman ba ninyo kana? [Nagaingon ang kongregasyon, "Amen."—Ed.] "Ginoo, itugot nga maglingkod ang akong anak diha sa usa ka kilid, ug ang usa usab ko ka anak diha sa pikas." Anaa ang pangandoy sa usa ka inahan alang sa iyang mga anak.

Apan bantayi. Pero, "Kana nga puwesto," miingon si Jesus, "predestinado na." Kini nga posisyon wala pa niadtong panahona. Ngano man? Himatikdi. "Igatugot kini ngadto kanila nga mga gipili nang daan alang niini." Unsa? Ang usa nga magalingkod diha sa tuo nga kamot, ug ang usa nga mamahimong labing duol Kaniya, mamahimo pa lang nga usa ka magdadaug. Kita n'yo? Kadto usa pa lang. . . Giingon Niya, "Ako—wala Ko kini ginahatag. Dili Ko kini mahimong ihatag, apan igahatag kini pagkahuman na sa mga pagsulay." Amen. Kita n'yo? "Dili Ko kini maihatag. Apan pagkahuman na sa mga pagsulay, manglingkod sila sa tuong kamot ug sa walang kamot. Kana ang mga gipili nang daan nga binhi nga nagpaabot didto alang niana. Igahatag kini ngadto sa mga gikasaaran niini. Igahatag kini didto, apan wala pa moabot ang pagsulay; nga, wala pa siya nagmadaugon." Kita n'yo?

¹⁵⁹ Ang tawo nga magalingkod niining puwesto sa usa ka kilid, ug ang usa nga maglingkod diha sa pikas nga bahin, nga tupad Kaniya didto sa Gingharian, wala pa kini gihatag, kita n'yo, wala pa sila nagmadaugon. Wala pa moabot ang pagsulay. "Moabot pa lang kini."

"Kung kita mag-antus alang kang Cristo ug sa Iyang Pulong, kita magahari uban Kaniya, kay Siya mao ang Pulong." Timani, "Kung kita mag-antus alang Kaniya ug sa Iyang Pulong, magahari kita uban Kaniya, sa Iyang Pulong."

¹⁶⁰ Himatikdi. Siya nga atong Ehemplo, nagmadaugon, ug dayon mikayab, human Niya nga gibuntog ang kamatayon, impiyerno, sakit, lubnganan. Ang tanang butang, gibuntog Niya. "Dayon mikayab Siya, ug nagdala og panon sa mga bihag, nanghatag og mga gasa ngadto sa mga tawo." Kana mao ang Daang Tugon, uban ang mga balaan sa Daang Tugon nga nagmadaugon. Nagpaabot sila sa ingon niana nga Tawo, ug nangamatay sila nga wala pa Kini nakaabot didto. Apan sa diha nga miabot na kini nga Tawo, "Apan dili Kini magauna kanila nga nangatulog." Amen. Walay pagkabuntog, sa unsa mang paagi. Mabuhi man o mamatay, unsa pa man ang mahimong kalainan niini? "Dili magauna." Kita n'yo? Nagapaabot sila alang niana.

¹⁶¹ Bisan si Job kaniadto, nagpaabot siya niini. Miingon siya, "Nasayod ako nga ang akong Manluluwas buhi man, ug sa

kaulahian nga adlaw Siya motindog sa ibabaw sa yuta.” Kana mao ang usa ka matarung nga tawo kaniadto, usa ka hingpit nga tawo. Nagahimo siya og mga paghalad kaniadto. Gihimo niya ang tanan nga butang nga gisulti kaniya sa Dios nga buhaton. Gibuhat niya kadto nga may pagtahud ug pagyukbo. Usa siya ka propeta. Ug dayon miabot si Satanas, aron sa pagtintal kaniya. (Sama lang nga nagaabot siya aron tintalon kamo.) Unsa ma’y gibuhat niya? Nagpadayon siya sa pagbarug didto.

Bisan ang iyang asawa migawas, miingon, “Dili ba nimo tunglohon ang Dios ug mamatay na? Makalooloy kaayo ka tanawon nga naglingkod dinha.”

¹⁶² Miingon siya, “Ikaw nagasulti sama sa usa ka babayeng buang.” Karon, wala gyud siya miingon nga buang ang iyang asawa, kondili nagsulti kini nga sama sa usa ka buang. Kita n’yo? Miingon, “Ikaw nagasulti sama sa usa ka babayeng buang.” Miingon, “Ang Ginoo mihatag, ug ang Ginoo mikuha; bulahan ang Ngalan sa Ginoo.” Nagmadaugon siya.

¹⁶³ Nagmadaugon siya sa kung unsa man ang ginasulti sa iyang mga silingan. Nagmadaugon siya sa kung unsa man ang ginasulti, sa tanang miyembro sa iglesia, ni Bildad, ug kanilang tanan. Nagmadaugon siya sa obispo ug sa kung unsa man ang ginasulti niini. Nagmadaugon siya sa kardinal ug sa kung unsa man ang ginasulti niini. Nagmadaugon siya sa denominasyon, sa kung unsa man ang ginasulti niini. Ug nagpabilin siya sa pagpamatarung sa Pulong. Amen, Bisan pa man, nahimo kadto nga bugti kaniya sa tanang butang nga anaa kaniya, bisan ang iyang mga anak. Gikiskisan niya ang iyang mga hubag sa usa ka bahin sa nabuak nga kulon, nga sa ingon niining kahintang, ug bisan niana nagmadaugon siya. Ug sa diha nga ang makuyaw nga takna sa pagtintal milabay na, nan mihawa ang mga panganod.

¹⁶⁴ Gitan-aw niya ang matag makatarunganong butang. Miingon siya, “Adunay paglaum ang usa ka kahoy kung kini man mamatay; mabuhi kini pag-usab. Ug ang usa ka binhi nga mahulog sa yuta, madunot man kini; mabuhi kini pag-usab. Apan ang usa ka tawo mapukan ug mabugtuan og ginhawa; ug ilubong na lang kini. Ug mangabot ang iyang mga anak, ang iyang mga anak nga lalaki, aron pasidunggan siya ug magbangotan alang kaniya; dili siya mahibalo niini. Dili na siya mobangon pa. Oh, anaa siya. Unsa ma’y nahitabo? Usa ako ka binhi, usab. Usa ako ka butang, nga usa ka binhi, ug malubong ako ngadto sa yuta. Dili na ako mabanhaw pag-usab. Mohigda na lang ako didto. Oh, nga sa sheol unta tagoan Mo ako, ibutang sa tago ako sa dapit hangtud nga mahupay ang Imong kaligutgut. Unta tagalan Mo ako og usa ka panahon ug hukman ako. Sa diha nga ang bato nagaligid, ginapaligid sa mga tubig ang bato.” Oh, nagpadayon pa siya, nga nagasulti sa niining nga

mga butang. Makita niya ang tanang mga ehemplo dinha, kung unsa kini. Oh, dili niya gayud kadto makita.

¹⁶⁵ Ug, Igsoong babayeng Rodgers, nahinumdoman mo pa ba sa dihang giwali ko kana niadtong paglubong ni Busty. Kita n'yo?

¹⁶⁶ Kung unsa, nga, “Iyang paligiron ang bato,” kung unsa kining mga butang. “Oh, O Ikaw, nga sa sheol unta tagoan Mo ako.” Nagpadayon siya sa gihapon. Miingon siya, “Unta mahibaloan ko. Unta mahibaloan ko kung asa ako padulong, ngadto sa usa ka Lalake nga mahimong ipandong Niya ang Iyang mga kamot kanako, usa ka tawong makasasala, ug ngadto sa usa ka balaang Dios, ug nga makapakigsulti Kaniya alang kanako.” Oh, sus! “Atua Siya didto. Nasayod ako nga Atua Siya didto. Adunay Usa Didto nga makahimo niana. Aduna gyu'y Usa sa kung asa man. Asa ko kaha makaplagaan kana nga Tawo? Asa ko kaha makaplagaan? Magapanuktok ako sa Iyang pultahan ug makig-istorya Kaniya. Kung adunay Usa lamang unta nga mahimong mopandong sa Iyang kamot kanako, ug sa Dios, ug—ug magtulay sa dalan alang kanako, makig-istorya! Kung makaplagaan ko lamang kanang Tawhana! Oh, asa kaha Siya karon?”

¹⁶⁷ Nangita siya sa tibuok niyang iglesia. Nangita siya sa tibuok niyang organisasyon. Wala siya'y makita og ingon niana nga Tawo.

¹⁶⁸ Ug sa kalit lang, ninghawa ang mga panganod, ug nakita niya ang ingon niana nga Tawo nga nagasingabot. Oh! Mikubakuba sa kalipay ang edaran na niyang kasingkasing. Dayon may butang nga nahitabo. “Nasayod ako nga ang akong Manluluwas buhi. Aduna gyu'y og ingon niana nga Tawo.” Amen. Aduna pa sa gihapon og ingon niana nga Tawo. “Nasayod ako nga ang akong Manluluwas buhi. Ug bisan pa, sa tapos ang akong panit nga kining lawas malaglag, unya diha sa akong unod makita ko ang Dios, Nga makita ko gayud mismo. Siya motindog ibabaw sa yuta sa kaulahiang adlaw.”

¹⁶⁹ Niadtong buntag sa Paskua sa Pagkabanhaw, sa diha nga nabanhaw Siya didto, ug ang lawas ni Job usa na lang ka kutsara sa abog, nagpaabot siya. Uban siya niadtong pinili nga Pundok. Mibangon Siya gikan sa lubnganan ug misulod didto sa ciudad, uban nila Abraham, Isaac, Jacob, Job. Oh, sus! Amen. Tungod nga, nagpaabot man sila sa ingon nianang Tawo.

¹⁷⁰ “Ug alang niadtong Mga nagapaabot kang Cristo diha sa ikaduha,” nga mga makahimo sa pagdaug sa mga butang nga iya sa kalibutan, pinaagi sa Iyang grasya, aron makasulod ngadto Kaniya, ug nga ginapiyong ang inyong mga mata ngadto sa unsa mang butang gawas lamang Kaniya ug sa Iyang Pulong, “Magapakita Siya sa ikaduhang higayon diha sa Himaya.”

“Kay ang trumpeta sa Dios patingugon, ang mga nangamatay diha kang Cristo mouna sa pagpamangon; kadtong

mga buhi pa ug ang nahabilin mangausab, sa kalit lang, sa usa ka pagpamilok, magkauban nga pagasakgawon, aron sa pagsugat Kaniya didto sa kawanangan.”

¹⁷¹ Kung ako man usa na lang ka kutsara sa abog, o kung ako man buhi pa sa pag-abot Niya, walay kalainan kini alang kanako. Amen. Dili kini igsapayan, tungod kay nakita ko ang panan-awon. Gilukot na ang tabil, ug makita ko na Siya. Usa nga mahimong motindog, ug akbayan ako, nga usa ka makasasala nga tawo, ug Siya nga usa ka balaang Dios. Ug Siya ang akong halad pagpasig-uli. Siya ang Pulong nga akong ginabaturan. “Sa sinugdan mao na ang Pulong.” Siya ang kanang Pulong, ug Siya ang nagarepresentar kanako, Didto. Amen. Ug igasinggit ko kini, samtang aduna pa ako’y gininhawa, “Siya ang akong Pagkabanhaw ug ang akong Kinabuhi.” Ug ang tanang ubang dapit maoy balas nga nagakaunlod. Ang tanang ubang dapit maoy balas nga nagakaunlod.

¹⁷² Sama sa pagsakgaw Niya kanila nga mga nanggipaabot alang niadto, Siya usab magaanhi alang sa matag-usa ka balaan sa Bag-ong Tugon nga nagmadaugon batok sa denominasyonhong mga kritiko, nga nagmadaugon gayud batok sa tanang nabantog nga mga kasal-anan sa niining adlaw, sa niining kapanahonan nga atong gikapuy-an karon, sama sa gihimo Niya sa tanang uban pa nga mga kapanahonan sa iglesia, sa kadtong mga nagmadaugon diha nianang kapanahonan sa iglesia. Kadtong mga nagmadaugon sa unsa? “‘Ako dato. Wala na’y nakulang kanako. Aduna ako. . . Oh, ako gyu’y *ingon niini* ug *ingon niini*. Ug ako ang Pangasaw-onon. *Ingon niini* ako. Wala na’y nakulang kanako.’ Ug wala mahibalo nga ikaw diay hubo, buta.”

¹⁷³ Nakita n’yo na kanang malimbongon nga kapanahonan nga ginasulti ko? Dili kini sila pareho sa kadtong mga gipangpugotan og mga ulo, kaniadto, aron nga makuha ang puting bato; dili sila pareho sa kadtong mga gipamatay tungod sa ilang pagtoo, ug gipangsunog diha sa mga haligi, ug mga butang nga sama niana; nga mga nakaangkon og purongpurong. Apan sa malimbongon kini nga kapanahonan karon, nga nanagdahum sila nga sila na ang tanan-tanan. “Bueno, miyembro man ako sa iglesia. Buotan man ako nga tawo. Buotan man ako nga babaye. Ginahimo ko man *kini*. Dili ko na kinahanglan himoon *Kini*.”

¹⁷⁴ “Apan kaniya nga magamadaugon,” kaniya nga nanagmadaugon sa tanan niining mga kalibutanong mga butang sa niini nga kapanahonan, unsa man ang himoon nila? Ang tanan magalingkod uban Kaniya didto sa Iyang trono; mahiuban sila sa pagsakgaw diha sa Iyang pag-abot. Oh, sus! Unsa pa man ang akong kabalak-an, kung ingon-ana? Unsa pa man ang atong kabalak-an sa kung unsay ipanulti sa kalibutan? Unsa pa man ang atong kabalak-an sa kung unsay ipanulti sa uban? Anaa sa atong taliwala ang gamhanang Balaang Espiritu.

Gipangulohan kita ug ginatultulan kita sa Iyang Haliging Kalayo. Gipanghimatud-an na ang Iyang Pulong sa atong atubangan. Anaa na sa atong kasingkasing ang Iyang gugma. Gitalikdan na nato ang kalibutan. Nakalabang na kita gikan sa kamatayon ngadto sa Kinabuhi. Ang dahum sa kalibutan nga nabuang ka na.

Apan kinahanglan ba nga inusarang pas-anon ni Jesus ang krus

Ug ang tibuk kalibutan mahatagan og kagawasan?

Adunay krus para sa matag usa,

Ug adunay usa ka krus para kanako.

¹⁷⁵ Trayntay-tres na ka tuig diha sa natad, ug kining balaan nga krus akong pagapas-anon hangtud nga ipalingkawas ako sa kamatayon.

¹⁷⁶ Isalikway man ako sa akong mga igsoon, isulti man nila ang bisan unsa nga gusto nila, sa pagsalikway kanako. Apan sa niining Pulong ako magabarug, ug sa Niini lang gyud.

Kini nga balaang krus akong pas-anon

Hangtud nga ipalingkawas ako sa kamatayon;

Ug dayon Makapauli na, diha sa Pagsakgaw, sul-obon na ang purongpurong.

¹⁷⁷ Mao kana ang tinguha natong tanan. Dili ba? [Nagaingon ang kongregasyon, “Amen.”—Ed.] Mao kana ang gusto nato. Kana ang atong—kana ang atong paglaum ug hangyo. Wala na’y uban pang hunahuna nga aduna kita, gawas nianang diha kang Jesus Cristo. Ug ngadto sa Iyang pagkamatarung kita nagabarug, diha lamang, ug ang Iyang pagkamatarung anaa diha sa Iyang Pulong. “Ug ang Pulong nahimong unod ug nagpuyo ipon kanato.” Ug ginapanghimatud-an pa sa gihapon sa Pulong ang Kaugalingon Niini.

¹⁷⁸ Sa unsang paagi magmadaugon? Pinaagi sa pagdawat sa Pulong, sa pagdawat sa saad, sa pagpa-ubos, mapainubsanon nga pagkinabuhi.

Kini nga balaang krus akong pas-anon

Hangtud nga ipalingkawas ako sa kamatayon;

Dayon Makapauli na, diha sa Pagsakgaw, sul-obon na ang purongpurong.

¹⁷⁹ Kay, “Pagmotingog na kanang Trumpeta!” Mahimong ilubong man ninyo ako sa dagat, apan pagapukawon ako sa maong Trumpeta. Husto. Mouli na ako, usa niana ka adlaw. Amen. Hangtud sa nianang adlaw, padayon akong makigbisog, amen, nga ginapas-an kini nga krus; nga ang akong mga mata nakatutok dili ngadto sa mga tawo, kondili ngadto sa Kalbaryo, tungod nga Siya mao ang akong ehemplo. Gipakita Niya kanato kung unsaon sa paghimo niini. Ug ang Iyang ehemplo, malipayon kita nga atong pagasundon kini, sa adlaw-adlaw.

I'm following Jesus each step of the way.

I'm following Jesus each step of the way.

¹⁸⁰ Nagustohan ba ninyo kana? [Nagaingon ang kongregasyon, "Amen."—Ed.] Oh, daw sa unsa ko ginapamalandungan, ang pagsunod Kaniya, sa adlaw-adlaw, sa matag lakang ko sa dalan.

Mag-ampo kita.

¹⁸¹ Ginoong Jesus, usa na ka oras ug kinse minutos karon, nga nagatindog dinhi, naningkamot sa pagwali sa Imong Pulong ug sa pagpasabot ngadto sa mga tawo kung unsaon sa pagpangdaug. Gisulti Mo kanamo kung unsaon niini paghimo. Dili Mo lamang kami gisultihan, kondili gipakita Mo kung unsaon sa paghimo niini. Gipangulohan Mo kami. Gipakita Mo kanamo kung unsaon sa paghimo niini; dawaton ang Pulong diha sa among kinasuloran, ug siguradohon nga nakapanghawid kami nianang Pulong, "Nahisulat na," diha sa matag pagtintal; pero magmapainubsanon lang, nagalakaw nga may pagpaubos. Kung ingon-ana nagmadaugon na kami, pinaagi Kanimo, pinaagi sa Imong gahum nga nagbuntog na sa among kaaway. Ug ang butang lamang nga among angay pagabuhaton mao—mao ang maglakaw lamang nga mapaubsanon inubanan sa pagtoo, nga nagatoo Niana, ug ang timaan sa ilhanan sa Espiritu Santo ania kanamo ug sigurado gyud nga molayas si Satanas.

¹⁸² Adunay mga panyo nga napahimutang dinhi. Nagrepresentar ang mga niini sa mga tawong masakiton. Nanginahanglan sila, Ginoo. Ug nabasa nila dinhi sa dili-mahimong-masayup nga Pulong kon diin gikuha nila gikan sa lawas ni San Pablo ang mga panyo ug mga tapis. Gipatong ang mga niini ngadto sa mga tawong masakiton. Migula ang dautan nga mga espiritu gikan kanila, ug nangahimo ang dagkung mga milagro. Karon, Ikaw ang mao ra sa gihapon nga Ginoong Jesus karon.

¹⁸³ Giwali ni Pablo kini nga Pulong, ug gisulat kini nga Pulong, ang mao ra sa gihapon nga Pulong nga ginapaningkamotan namong sundon. Tungod kay, gikuha niya ang Daang Tugon ug gihimo kining sundanan, ug gipakita nga usa kadto ka tipo, nga ang tibuk Daang Tugon maoy usa ka hingpit nga tipo sa Bag-o. Oh Ginoo, hinaut nga masunod namo kana nga ehemplo.

¹⁸⁴ Nakita namo ang among Ginoo, kung unsa ang Iyang gibuhat. Ug nahibaloan namo kana, niining buntaga, nga kadtong mga balaan sa Daang Tugon, nasayran namo nga nangadto sila. Sa dihang nabanhaw si Jesus, miuban sila Kaniya. Ug, Ginoo, nagatoo kami nga mangbiya na kami sa dihang patunggon na Niya ang Trumpeta. Nagatoo kami niini, nga ang Pangasaw-onon mobiya na nianang Adlawa ug makauban kadtong—kadtong Hebreohanon nga panon Niini, ug, magkauban, nga maatua didto sa Pangkasal nga Panihapon diha sa Kahimayaan. Kadtong mga nagapaabot.

Ginapangamuyo namo karon ang Imong kalooy ug grasya diha kanamo. Mga magdadaug, Ginoo, ang mahimong mga mga magdadaug, maoy among mga tinguha. Dauga kami. Ginoong Jesus, nagmadaugon Ka sa kalibutan. Karon nagaampo ako nga itugot Mo sa matag tawo dinhi, niining buntaga nga, “Isalikway ang matag sala, isalikway ang kabug-at nga sa dakung kasayon nagapiit paglikos kanamo, aron nga mahimo namong dalaganon nga mapailubon ang lumba nga gitanyag sa among atubangan.”

¹⁸⁵ Gihisgotan kini ni Pablo, among Langitnong Amahan, dinha sa Basahon sa Mga Hebreohanon, nga, “Isalikway namo ang tanan nga kabug-at,” sa nianang ika-12 nga kapitulo, nga gihisgotan niya kini, human nga iyang gipakita pinaagi sa pag-ehemplo, kaniadto: kadtong mga nagpadayon; kadtong mga wala nagpadayon; kadtong mga dagaang nga nagsunod; kadtong mga nagsunod didto sa unahan; kadtong mga nagpabilin diha sa ulahi. Oh! Tanan na, iyang gipakita ang mga panig-ingnan niini. Dayon milingi siya ug miingon, “Isalikway ta ang tanan nga kabug-aton, ang tanang gagmay’ng mga butang nga nagapiit paglikos kanato, aron nga mahimo natong dalaganon nga mapailubon ang lumba nga gitanyag sa atubangan nato; nga nagatan-aw ngadto Kaniya, ang magbubuhay ug ang maghihingpit sa atong Pagtoo, nga Siya mao ang naghatag sa ehemplo.” Ginahimo namo kana niining buntaga, Amahan.

¹⁸⁶ Karon, samtang nanagduko ang atong mga ulo, susiha og maayo karon, maayo, sa maayo gyud. Ug dayon, magmahimong sinsero gayud. Kini lamang—kinahanglan lamang niini. . . Kana lamang ang gikinahanglan niini: ang imong pagsusi ug ang imong pagkasinsero. Siguradoha gayud samtang nga imong ginasusi karon. “Susiha ako, Ginoo. Sulayi ako. Aduna ba’y kadautan kanako? Kung aduna man, Ginoo, tugoti kong itugyan kini, dinhi mismo karon. Sa niining dapit, kon diin ako nagayukbo, sa Imong altar. Ako kining ginabutang, dinhi mismo karon, nga ginatamak ko ang akong mga tiil ibabaw niini. Sa paglakaw ko palayo, magapabilin kini dinha. Pagahanawon kini sa gahum sa Imong Dugo. Gusto kong mamahimong magdadaug. Aduna ko’y usa ka butang nga nagababag kanako, Ginoo. Gusto ko nga magmadaugon, niining buntaga. Mahimo ko, pinaagi Kanimo. Giingnan ako niana, sa Imong Pulong. Ginabutang ko kini karon, Ginoo, ug ginapatong ko ang akong mga tiil ibabaw niini. Sa paggawas ko niining bilding niining buntaga, molakaw, nga nasayod nga gibutang na kini diha sa—sa banyera sa dugo sa Dios nga nagapaputi. Dili na gayud kini mahinumduman pa. Ako kini karon ginasugid ug nagapangayo alang sa Imong kalooy.”

¹⁸⁷ Samtang nga nagduko ang atong mga ulo, ginapiyong ang atong mga mata; namalandong ang atong mga kasingkasing, kana karon ang pultahan ngadto sa kalag. Aduna ba’y butang nga gusto ninyong isalikway niining buntaga, butang nga gusto

ninyong daugon? Ug gipanguhaan na ninyo kini sa hilabihan kaayo, apan, niining buntaga, undangon na ninyo ang maong pagpanguha. Imo nang dawaton kung unsa ang Iyang gihimo. Gusto ko nga ipataas lang ninyo ang inyong kamot, ingna, “Ginoo, gusto ko nga magmadaugon. May usa ka butang nga nagapahasol kanako.”

¹⁸⁸ Ginoong Jesus, nakita Mo ang kanang mga kamot. Karon, ingon nga Imong alagad, nga nagatindog taliwala sa mga buhi ug patay, ginahinginlan ko ang tanan nga butang nga nagahasol sa niining mga tawo ug sa akong kaugalingon. Ug ginapangamuyo ko kini diha sa Ngalan ni Jesus Cristo, nga mahimo na namong ibilin kini dinhi sa altar sa Dios, ug manghawa na niining buntaga, nga gawasnon na, ingon nga mga magdadaug.

¹⁸⁹ Kung wala pa nakaangkon og grasya ang among mga igsoong babaye, hinaut nga itugot kini karon, Ginoo. Kung wala pa nakaangkon og grasya ang among mga igsoong lalake, hinaut itugot kini karon. Ug hinaut, diha sa pagkamapainubsanon, mamahimong ingon niana ang inahan ngadto sa iyang mga anak, kay sa magmapahitas-on. Nahibaloan niya nga siya nagakahimong... Usa siya ka magwawali ngadto niining gagmay'ng mga anak. Ang iyang kinabuhi usa ka ehemplo. Si Papa usa ka ehemplo ngadto kang mama, kay siya mao ang ulo sa panimalay. Gipanguhaan sa inahan nga mando-mandoan siya; dili na gayud niya kini himoon pa. Kung dugay na sa bana gigamit ang iyang asawa ingon nga usa ka trapo, dili na gayud kini himoon pa. Usa ka kaabag ang asawa. Itugot kini, Ginoo. Hinaut ang tanan niining mga butang nga nagababag kanamo, Ginoo, matangtang na.

¹⁹⁰ Among—among ginahalad ang among mga kaugalingon, Amahan, alang sa unsang nahibilin pang panahon sa kinabuhi sa unahan namo, nahibalo niini, nga kami modangat gayud ngadto sa katapausan niini, ug kana haduol na. Busa, niining buntaga, ginapahimuslan namo kini nga kahigayonan, human sa niining Mensahe. Ginapahimuslan namo ang maong kahigayonan, Ginoo, sa pagduol, tungod kay ginadapit kami nga moduol. “Itugyan ngadto Kaniya ang inyong mga kabalaka, kay Siya may kahingawa alang kaninyo.” Nahibalo ako nga may kabalaka Ka, Ginoo. May igong kahingawa Ka aron mamatay alang kanamo. Ug sigurado kaming may igong kahingawa aron moduol ug dawaton ang hinungdan nga Ikaw namatay.

¹⁹¹ Balaana kami, Ginoo. Pun-a kami pag-usab sa Espiritu Santo. Hinaut nga ang Balaang Espiritu mao gayud ang maghari sulod sa among mga kasingkasing, sa hingpit, nga manglakaw kami, nga gikalimtan ang mga butang nga nangagi na, ang hugaw ug lapuk nga sa makausa kaniadto among gipuy-an. Tugoti kami nga mopadayon ngadto sa dauganan sa langitnong pagtawag, kon diin ang among mga Kahayag mahimo gayud nga modan-ag nga may kalumo ug nga mapainubsanon, hangtud

ang matag moagi makaingon, “Adunay usa ka Cristohanon nga nagapuyo didto sa bungtod. Kana nga tawo, kana nga babaye, kana nga lalaki, usa gayud ka hinalad nga bulak sa Dios. Maayohon ug buotan kaayo sila, kanunay mapinanggaon ug malulot, ug masinabtanon.” Itugot kini, Amahan. Hinaut nga mamahimo kaming mga asin, aron uhawon ang kalibutan; itugot kini, Amahan; ug dauga alang kanamo ang mga butang sa niining kalibutan, ug ang kahingawa sa niining kinabuhi. Sa Ngalan ni Jesus Cristo. Amen.

I can . . .

Itaas nato karon ang atong kamot.

. . . Saviour . . .

Nagapanawag alang sa unsa? “Gumula ka, gikan sa lapuk.” Usa ka mas taas nga Kinabuhi; Usa ka butang nga anaa kanimo, ang nagabira kanimo sa nianang paagi. Unsa man kini? Siya kini. Ilalum sa lapuk, adunay gagmay’ng mga bulak; aduna ka’y Kinabuhi sa sulod dinha, nga nagatulod kanimo. Kana mao ang nagapanawag kanimo, “Gumula ka, gikan sa lapuk.”

Follow, follow . . .

¹⁹² Karon, sinsero ba gyud mo niini? Ipiyong ninyo karon ang inyong mga mata.

Where He leads me I will fol- . . .

Karon isurender ang inyong kaugalingon. Mag-masinsero niana, karon.

Where He leads me I will follow,
Where He leads me I will follow,
I’ll go with Him, with Him, all the way.

Where He leads me I . . .

Karon buhata kini nga may kalumo. Hinumdumi, ipahiluna ninyo dinha ang inyong kaugalingon.

He leads . . .

“Ipahimutang ko kini dinhi, Ginoo. Magasunod ako Kanimo, gikan karon. Gidawat ko Kini. Nagatoo ako Niini.”

Where He leads . . .

Hinumdumi, labaw nga mopamatuod ang inyong kinabuhi kay sa inyong baba. Labaw nga magpamatuod ang inyong pagkinabuhi ngadto sa mga tawo kay sa kung unsa ang ginasulti ninyo.

Go with Him, with Him, (sa dalan, nga asa man?) all the way.

[Nagasugod si Igsoong Branham og paglaylay sa *Where He Leads Me*—Ed.]

¹⁹³ Ihalad lang ang inyong kaugalingon, nga gikan gyud sa kinasuluran, sinsero, tibuok sa inyong kasingkasing. Unsa kaha

kung kini na ang katapusang higayon nga gikatugot kanimo aron mag-ampo? Mahimong ingon niana kini. Nagalaum ako nga dili pa. Mahimong ingon na niana kini. Nan, siguradoha karon, nga sigurado gyud, sigurado gyud. Hinumdumi, isarado na ang pultahan, usa niana ka adlaw, dayon tapos na ang kining tanan. “Pangayo, kamo makadawat.”

[Nagasugod si Igsoong Branham og paglaylay sa *Where He Leads Me*—Ed.]

¹⁹⁴ Hunahunaa lamang ang tanan nga himaya nga Iyang gitanyag kanimo, ang tanan nga Iyang gihimo. “Nagatoo ako, Ginoo. Nagatoo ako. Nagatoo ako nga Ikaw mao ang akong magdadaug. Magalakaw ako uban Kanimo, Ginoo. Gusto ko nga magpabilin nga duol Kanimo, nga kung asa Ka, gusto kong didto usab ako.”

¹⁹⁵ Ug hinumdumi, nagsulti Ikaw kanamo, Amahan, nga, “Makauban namo ang Ginoo hangtud sa kahangturan, pag-gisakgaw na kami.” Nagkaaduna kami og usa—usa ka daklit nga pagtan-aw ngadto Kaniya karon, samtang kauban namo Siya nga nagalakaw karon. Apan bisan pa niana kami. . . Daw sa unsa ka dakung butang kini, nga mahibaloan nga Siya ania sa among—among taliwala! Unsa pa kaha kini kung kauban na namo Siya sa kahangturan? Gimahal gayud namo tanan ang among mga ginapamuhat: makapangabayo kami; makapamalit kami; makapangayam kami, makapangisda, o unsa pa man ang gikalipayan namong buhaton. Apan, oh, sa diha nga abli na ang simbahan, kita n’yo, gusto namo nga mahimamat ang among Ginoo. Kana mao ang pinakahalangdon sa tanan nga mga butang. Dayon, ang mahunahuna, nga nagsaad Siya kanamo. “Ug nga hangtud sa kahangturan makauban na ang Ginoo. Molingkod uban Kaniya diha sa Iyang trono, ug kauban Siya hangtud sa kahangturan.” Oh Dios, sa mapainubsanong paagi, uban—uban sa pagduko sa among mga ulo, among ginadawat kini, Ginoo, sa Ngalan ni Jesus Cristo.


¹⁹⁶ Nabati n’yo ba nga mahimo na ninyong biyaan, karon, ang tanan, ang tanang palas-anon? Mahimo na ba ninyong lakwan, ang ibabaw niini karon? Kung mahimo ninyo, ipataas ang inyong kamot, ingna, “Pinaagi sa grasya sa Dios akong ginabuhian kini nga pagsulay. Dili ko na kini pakigbatokan, pa. Gunitan ko na lamang ang Iyang kamot, ug magsugod sa paglakaw.”

“Nakigbisog ako, Igsoong Branham. Gipaningkamotan ko nang undangan ang pagpanigarilyo. Ako—gipaningkamotan ko nga pataason ang akong buhok. Gipaningkamotan ko ang pagbuhat *niini*. Tapos ko nang. . . Gipaningkamotan ko, gayud, Igsoong Branham. Dili ko gayud kini mahimo.”

Ayaw na kini sulayi, pa. Panggunit lamang sa Iyang kamot, ingna, “Amahan, ipasulod Mo ang akong kamot diha sa manggas.” Kita n’yo? “Thatag ko na lang Kanimo ang akong

kamot. Magpadayon ako sa paglakaw, Ginoo, nga nagatutok Kanimo.” Mamatuman kini. Pagabistihan ka niini nga sama gayud sa usa ka tinuod nga Cristohanon. Mamahimo kang tinuod nga Cristohanon.

¹⁹⁷ Hangtud nga magkita kita, unyang gabii, ang Dios nahigugma kaninyo ug magauban kaninyo. Mga anak ko kamo sa Ebanghelyo. Mga pinalit na kamo.

Karon akong ginahatag kaninyo balik ang inyong pastor, alang sa pagpapauli na kaninyo, Igsoong Orman Neville. 

UNSAON KO SA PAGDAUG? CEB63-0825M
(How Can I Overcome?)

Kining Mensahe ni Igsoong William Marrion Branham, una giwali sa Ingles niadtong Dominggo sa buntag, Agosto 25, 1963, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2016 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org